



Э. И. Полякова

КОМИ СЁРНИ

Коми кывйысь
уджъяс

Сёрни

Текст

Шы, шыпас
Кывтэчас

Сёрникузя

Кывсикасъяс

Отвужъя кывъяс

2

Э. И. Полякова

КОМИ СЁРНИ

Коми кывйысь уджъяс

2 класс



*Лэдзöма
Коми Республикаса йöзöс велöдан министерство
индöд серти*



Сыктывкар
2013

ББК 74.268.19=664.2
П 54

Велөдчан небөгсө дасьтөма
Коми Республикаса велөдчөм сөвмөдан институтын

Серпасалис **Инна Авилова**

ОТСАСЯН ПАСЪЯС:



– велөдан тема



– кывлөн вежөртас



– сёрни сөвмөдан да творчествоа удж



– зарни куд



– мөвпышт (юржуглан, нөдкыв)



– ёрта-ёрткөд уджалөм



– комиөд гижөдсө, орччөд коми да роч гижөд

Полякова Э.И.

П 54 Коми сёрни: Коми кывйысь уджъяс. 2 класс. – Сыктывкар:
ООО «Анбур», 2013. – 144 л.б.

ISBN 978-5-91669-114-6

ББК 74.268.19=664.2

«Коми сёрни» небөгсө дасьтөма мөд класса велөдчысьяслы коми кывйысь содтөд уджъяс вөчөм могысь. Велөдчан небөгас пыртөма ас кежысь вөчөм вылө уна сикас удж.

«Коми сёрни» небөгысь уджъяссө челядь вермасны вөчны и школын, и ас кежысь гортын.

ISBN 978-5-91669-114-6

© Полякова Э.И., 2013
© Авилова И.А., иллюстрации, 2013
© Оформление. ООО «Анбур», 2013



1 удж. Мичаа лыдды кывбуръяссө.

Выль велөдчан во
Но кыдз татшөм асылө
Узьны мен позьö?
Öд школаысь сэтшöма
Бырöма гаж!
И важөн нин дасьтöма
Менам бур козин –
Зэв мича яр дзоридзьяс –
Гажöдны класс.

А. Мишарина

* * *

Коді миян муын олө,
Коми кывсö тöдны колö.
Коми кывйыс – абу шома,
Сійö – юмов, сылö вомад.

А. Лужиков

- 1. Мыйла коми йöзлы колö бура тöдны коми кывсö?
 2. Мыйла тэ велөдан асьыд чужан кывтö?
 3. Кыдзи гөгөрвоан «*Коми кывйыс – абу шома, сійö – юмов, сылö вомад*» сёрникузя?
 4. «Мыйла колö велöдны чужан кыв?» тема серти дасьты висьт.

СЁРНИ. ТЕКСТ



Сёрни

2 удж. Лыдды кык ёртлысь сёрнисö колана ногөн. Коді юасьö, а коді вочавидзö?

- Öльöксан, кызди тэ коллялін гожöмтö?
- Ме гожöмбыд олі пöль-пöч ордын, чери кыйи, вотчи, отсаси налы. А тэ, Ваньö, кытчö ветлін?
- А ме вежань дорö юркарö ветлі.



3 удж. Серпас серти дасьты мойдса геройяслысь öтка да морта-морт сёрни.



4 удж. Лыдды Настялысь висьталомсö.

Коми кыв урок вылын ме велöдча öшыбкатöг мичаа гижны, бура сёрнитны. Кöсья гөгөрвоны, мыйла öткымын кывлөн торъялö шы да шыпас лыдыс. Меным окота тöдны, кызди озырмö да сöвмö миян чужан кыв, кызди артмöмаöсь коми кывъясыс.

- 1. Висьтав, мыйла Настя велöдö коми кывсö.
- 2. Мый тэ вöчан коми кыв урок вылын?

5 удж. Лыдды.

Бур асыв!

Бур лун!

Бур рыт!

Видза олан!

Чолöм!

- 1. Висьтав, кор тайö кывъяснас вöдитчан.
- 2. Кутшöм вежавидзана кывъясөн тэ чолöмасын да янсöдчан?
- 3. Кызди колö сёрнитны?

6 удж. Лыдды сёрнисö.

– Бур асыв, Настук! Чеччы да зiля мыссы. Регыд школаö мунан кад.

– Бур асыв, ыджыд мам! Ме садьми нин.

– Бур асыв, Оля! Мед эськö ог жö сёрмöй школаад...

– Бур асыв, Настя!

- 1. Кутшөм кывъясөн чолөмасис Настя аслас пөчыскөд да чойыскөд?
- 2. Кызди чолөмасын тэ мам-батыдкөд да чойвокыдкөд асывнас?
- 3. Вайөд матын вежөртаса кывъяс **видзаасыны** кывлы.

7 удж. Лыдды текстсө.

Помасисны урокъяс. Ольөксан Дима ёртыскөд пыралісны библиотекаө да босьтісны коми мойдыяс. Сэсся найө мөдөдчисны гортаныс.

- Видза колянныд, Екатерина Ивановна!
- Аддзысылытөдз, Ольөксан! Аскиөдз, Дима. Став бурсө тіянлы!

- 1. Кызди янсөдчисны велөдысь да велөдчысьяс?
- 2. Кутшөм кывъясөн янсөдчанныд ті?
- 3. Петкөдлы, кызди тэ янсөдчан велөдысьыдкөд, ёртыдкөд да бать-мамыдкөд.



Кыв. Сёрникузя да сёрни

8 удж. Лыдды кык ёртлысь сёрнисө.

- Миша, кутшөм вотос тэ радейтан?
- Ме радейта чөд. А тэныд, Ваня, кутшөм вотос медчөскыд?
- Ми төрыт мамөкөд өшинь улысь вотім юмов өмидз.

- 1. Помав Ванялысь висьталөмсö.
- 2. Сёрнитышт ёртыдкөд либö чой-вокыдкөд радейтана вотöс йылысь.

9 удж. Лыдды Александра Мишариналысь кывбурсö.

Воом вотöс юмов, чöскыд.
 Ачыс пырö вомö.
 Чödъя нöрыслөн мед эськö
 Оз и волы помыс!

- 1. Тöдмав сёрникузя лыдсö.
- 2. Кымын кывйысь артмöма мöд сёрникузяыс?

10 удж. Лыдды А. Мишариналысь кывбурсö.

Вотчысь

Чойкөд ветлім вотны чöd –
 Кияс, вом доръясным съöd.
 Менам чуман пыдöс тыри.
 Сэсся чödйыс вöрсъыс быри.
 Чатрасян пö, шуö чойö.
 Ог эськö да – вомöй сёйö.

- 1. Мый верман висьтавны вотчысь йывсьыс?
- 2. Аддзы кывбурысь **гоннялан**, **öктыны** кывъяслы матын вежöртаса кывъяс.



Чуман – вотöс да тшак вотöм вылö сямöдысь вöчöм көрöб кодъ доз.



11 удж. Орчөд вотосъяс. Висътав торъялөмсө да өткодълунсө.



12 удж. Лыддыгы гижөдсө.

Помтөм мичлун да озырлун ас пытшкас видзө коми парма. Миян пармаын быдмөны пожөмъяс да козъяс. Пуяссө гожөмнас шонтө жар шондi, төвнас тупкө небыдик лым. Пармаыд тэнө чөсмөдлас сэтөрөн да өмидзөн, чөдйөн да чөдлачөн, мырпомөн да озыөн, пувйөн да турипувйөн.

- 1. Висътав, мыйөн озыр миян парма.
- 2. Гиж өшыбкаястөг өти сёрникузя.

13 удж. Төдмась сёрникузя схемаөн.

Ваня **кодкөд?** **мунис** **кытчө?** **мыйла?** .

- 1. Артмөд кывтэчасъяс:
 - Мунис *кытчө?* → Мунис
 - Мунис *кодкөд?* → Мунис
 - Мунис *мыйла?* → Мунис
- 2. Гиж Ваня йылысь өти сёрникузя.

14 удж. Лыдды гижөдсө.

Петісюгыдшонді. Сійөшонтісмусө.
Гажаассыліснылэбачьяс.

• 1. Позьө-ө гижөдсьыс аддзыны сёрникузяяс?
Кызди? Лыдды найос.

2. Аддзы вайөдөм схемалы лөсялысь сёрникузя
да гиж сійөс.

Кызди? **мый вөчисны?** **кодьяс?** .

3. Гиж куим кывтэчас.

15 удж. Төдмась сёрникузя схемаясөн.

1) **Кор?** **коді?** **кодкөд?** **мый вөчим?** **кытчө?** .

2) **Көні?** **мый вөчим?** **мый?** .

3) **Кытысь?** **коді?** **кызди?** **мый вөчис?**
кутшөм? **мый?** .

• 1. Сетөм схемаяс серти лөсьөд куим сёрникузя.

2. Сёрникузяяссө лөсьөд сетөм темаясысь өти
вылө: **Гожөм. Вөрын. Ю дорын.**



Текстлөн тема да шөр мөвп. Юрним



16 удж. Лыдды текстсө.

Өти арся лунө Петя ветліс вөрө тшакла. Сійө
көрзина тырыс чукөртіс выльысь петөм тшак да
мөдөдчис гортас.

Друг кыліс кутшөмкө шы. Куст улысь зонка аддзис ичөтик урөс. Лапайс сылөн вөлі доймөма. Петя пөрччис шапкасө да пунктис сэтчө доймөм урөс. Гортас детинка вердіс урсө өрешкиөн да йөлөн.

Некымын лун мысти урыд бурдіс. Петя нуис сійөс вөрө. Гашкө, өні на урыд чеччалө увйысь увйө.

- 1. Инды текстислысь темасө да шөр мөвпсө.
- 2. Бөрйы текстислы лөсялана юрним: **Тшак вотігөн. Урлы отсөг. Бур сьөлөма Петя.**



Бур сьөлөма.



17 удж. Лыдды.

Чикышөс, потшөс бокысь, казяліс, Вова. Борд-йыс, сылөн, чегөма. Лэбачсө, гортө, зонка, вайис. Кутіс, регыд, да, бурдіс, лэбавны, чикышыд. Сійөс, Вова, вөля вылө, лэдзис.

- 1. Висьтав, позьө-ө лыддьөмторсө шуны текст-өн.
- 2. Сетөм кывъясысь лөсьөд вит сёрникузя.
- 3. Лыдды быд сёрникузя да гөгөрвоод текстис-лысь темасө.
- 4. Гөгөрвоод шөр мөвпсө, юрнимав да гиж.



18 удж. Лыдды мойдсö.

Олісны-вылісны кык кöч: Уджач да Дышник. Уджачыд вöлі зэв зіль. Лун-лун уджаліснокис. А Дышникыд водз асывсяньыс сёр рытöдз тривкъяліс-котраліс.

Уджачыд гожöм чöж дасьтысис төв кежлö: лосьöдіс аслыс оланін, дасьтіс сёян. А Дышникыдлы төв йывсьыс весиг некор вöлі мөвпыштны: чеччаліс-йöктіс да гажöдчис вöрын.

Воис кöдзыд төв

- 1. Висьтав, мыйла тайö гижöдсö шуöма мойдөн.

- 2. Вайöд матын вежöртаса кывъяс **зіль**, нур кывъяслы.

- 3. Вайöд паныд вежöртаса кывъяс **петкöдчис**, **зіль** кывъяслы.

- 4. Помав мойдсö да юрнимав.

19 удж. Лыдды Серафим Поповлысь кывбурсö. Гөлөснад торйöд колана кывъяссö.

Тöлын уна удж оз вöч
Дженьыд бöжа тэрыб кöч.
Мый нö колö вöчны
Дзикöдз кынмöм кöчлы?

- Вайöд матын вежöртаса кывъяс **тэрыб** кывлы.

КЫВТЭЧАС ДА СЁРНИКУЗЯ



**Юёртана, юалана да чуксалана сёрникузяс
Горёдана да абу горёдана сёрникузяс**

20 удж. Лыдды.

Сёрнитігтыр Ваня пёчыскөд восьлалісны вёрса туйөд. Вөр туй бокысь зонка казяліс лөп чукөр: сімөм көрт тувъя плакаяс, тыртөм краска дозъяс, ковтөм эмбур.

– Со кытчө став ковтөмторсө кодкө ваялөма! – шай-паймуніс пөч.– Оз жө эськө ков вөр-ватө тадзсө омөльтны. Вёрыд өд миянөс вердысь-юкта-лысь! Видзны сійөс колө!

Э. Полякова

- 1. Вайөд **омөльтны, восьлавны, лөп** кывъяс дорө матын вежөртаса кывъяс.
- 2. Лөсьөд кык чуксалана сёрникузя.
- 3. Висьтав, мыйла колө видзны вөр-васө.

21 удж. Лыдды сёрникузяссө.

Өти арся лунө ми ветлім вөрө.
Кутшөм мичаа вөччөмаось коръя пуясыс!
А тэ аддзылін арся вөрлысь мичлунсө?

- 1. Аддзы сёрникузя, көні висьталысьыс мый йылысь кө юөртө.

2. Кутшөм сёрникузяын петкөдлөма нимкодясьөм?

3. Аддзы сёрникузя, көні эм юалөм.

22 удж. Лыдды.

1) Йөз лосьөдісны кывйөзъяс да шусьөгъяс

2) Коді медся тэрыба лыддяс кывпесансө

3) Кутшөм мыла коми кывйыд

• 1. Төдмав сёрникузяяслысь сикассө.

2. Гиж сёрникузяясө колана пасъяс пукталөмөн.

23 удж. Лыдды куим сёрникузялысь заводитчөмсө.

Арся луныс сэтшөм

Коді медся мичаа

Ми велөдчам бура гижны, лыддысьны да

• 1. Помав сёрникузяяссө да лыдды колана ногөн.

2. Гиж колана пас пуктөмөн горөдана сёрникузясө.

24 удж. Лыдды колана ногөн.

Сійө ловъя, и лышкыд, и мича –

Коми му пасьта лөзалысь вөр!

А. Ванеев

- 1. Кызди гөгөрвоан кывбурысь лөзалысь вөр кывтэчас?
- 2. Мыйла гижысьыс вөрсө шуома ловъяөн да лышкыдөн?
- 3. Төдмав сёрникузя сикассө.

25 удж. Лыдды. Гиж текстсө колана кывъяс содталөмөн.

Сиктсаянь неылын эм ... яг. Асывнас тані
Бур гожөмнад и вотөсыд, и тшакыд эм. Сөмын эн дышөдчөй да вотчөй! Кужөмөн вөдитчөй ... яглөн козиннас да мичлуннас!

Отсөг кывъяс: кыпид, гажа, озыр, лышкыд, мича.

- 1. Позьө-ө гижөдсө шуны текстөн? Мый серти?
- 2. Аддзы чуксалана сёрникузяяс.

26 удж. Лыдды Владимир Ширяевлысь кыв-бурсө да лөсьөдчы гижны юрвежсьыд.

Ур

Кольөм төлын урөс
Велөдіс мороз.
Таво сійө бурөс
Дасьтіс аслыс поз.

- 1. Инды орфограммаа кывъяссө, көні гижигөн верман торксьыны.

2. Велөд кывбурсө наизусьт.
3. Небөгө видзөдтөг гиж кывбурсө юрвеж-сьыд.
4. Лөсьөд ачыд ур йылысь кывбур.



27 удж. Видзөд серпассө.

• 1. Лыдды: **тэрыб ур, котралө пуяс костөд, өшлө косьтыны пу увъяс вылө, төвъяс шоныд горсъяс.**

2. Серпас да сетөм кывъяс пыртөмөн лөсьөд «Төждысьысь ур» висьт.



28 удж. Лыдды мойдсө.

Коз лап вылын пукаліс Ур. Видзөдліс увлань: коз улас Көчиль бөрдө, лапанас синвасө чышкалө.

– Мыйла нө тэ, Көчиль, бөрдан? – юалис Ур.

– Ме... ме мамөс вошті! – синвасө чышкалігтыр, вочавидзис Көчиль.

– Эн шогсьы! Ме отсала тэныд мамтө корсьны, – такөдіс шогсьысь Көчөс Ур. – Со тэныд коль. Тайө коллыс вайөдас тэнө мамыд дорө.



- 1. Аддзы текстсыь бурөдіс кывлы матын ве-жөртаса кыв.
- 2. Лөсьөд мойдыслы пом.
- 3. Юрнимав мойдсө.
- 4. Лөсьөдчы мойдны ёртъясыдлы.



29 удж. Видзөд серпасъяссө.



- 1. Серпасъяс серти лөсьөд нюмсера висът да юрнимав.
- 2. Лөсьөдчы висътавны сідзи, медым кывзысь-яслөн петіс серамыс.



30 удж. Лыдды рочөн гижом текстсө.

Белка

В старой сосне дупло. Здесь живёт белка. Она запасла на зиму еду. Белка собрала ягоды и шишки, засушила грибы. Этот корм зверьку на зиму. Теперь белка не страшится зимы!

- 1. Комиод висьтсö да гиж.
- 2. Прöверит уджтö.



31 удж. Лыдды текстсö.

Паляур

Паляур – тайö лэбалысь ур. Сылөн кокъяс костас эм кучик. Пышйигөн паляур паськөдö кучиксö. Артмö лэбачлөн кодь борд. Тадзи паляур вермö лэбзыны öти пусянь мөдö вель ылөдз.

Лэбалысь ур олö войын. Луннас узьö пу горсйын. Сёйö кызд пу гар, вöрса дзоридзлысь кöйдыссö да пожöм коль.



- 1. Босьт төд вылад төдчөдөм кывъяслысь гижанногсö.
- 2. Ас кывйөн висьтав паляур йылысь.
- 3. Вочавидз юалөмъяс ылө да гиж изложение.
 - 1) Коді сійö паляурыс?
 - 2) Мый сылөн эм кокъяс костас?
 - 3) Кызди сійö лэбалö?
 - 4) Мый вöчö паляур луннас да войнас?
 - 5) Мый сійö сёйö?



Подувнас

32 удж. Лыдды.

1) Сикт бокин визувтö ю. 2) Катша радейтö югыдторъяс. 3) Берег пöлöныс быдмö лежнöг. 4) Пуысь пуö чеччалö тэрыб ур. 5) Эрд вылын быдмö джуджыд пожöм.

- Висьтав, код йылысь либö мый йылысь висьтавсьö быд сёрникузяын.

33 удж. Лыдды кывъяссö.

шонді

лэбачьяс

дзоридз

кöк

- 1. Лöсьöд некымын сёрникузя, медым кывъясыс вöліны подувпасөн.

2. Лöсьöдöм сёрникузяяссö гиж да öти визьөн визьнит подувпассö.

34 удж. Лыдды колана ногөн Василий Лодыгинлысь кывбурсö.



Оз

Дзебыштöма банйöм юрсö
Озйыс турун пиö.
Бурөн сійö оз и сюр,
Оз и веськав киö.

Вештыштан кор турун йывсö,
Сэки озйыс сюрö.
Мичмöдö став ывлавывсö –
Киад шондi тюрö.

• 1. Кутшöм кывйöн Василий Лодыгин вежöма оз кывсö?

2. Кызди гөгөрвоан: «дзэбыштöма банйöм юрсö», «киад шондi тюрö»?

3. Аддзы текстсы саймовтöма кывлы матын вежöртаса кыв.

4. Мыйла озсö гижысыс орчöдöма шондикöд?

35 удж. Лыдды сёрникузяссö.

1) Ми чойкöд вотiм чöскыд оз.

2) Вöрын оз позь чегъявны том пуяс.

• 1. Аддзы öткодя шуан да гижан кывъяс.

2. Орчöд оз кывъяссö да висътав, мыйöн найö торъялöны.

36 удж. Лöсьöдчы гижны диктант.

Оз вотiгөн

Нöрыс боқыс ме вотi оз. Ягсянь лэбис лэбач. Сийö мöдiс кытшлавны нöрыс весьтын. Турун пытшкыс казяли кык ичöтик лэбачöс. Найö дзоргисны ме вылö. Гөгөрвои лэбачлыс майшасьöмсö да мунi сэтыс.

С. Раевский серти



Юөрпас

37 удж. Лыдды гижөдсө.

Вөрын тшөкыда кывлан пуө колскөдчөм да таргөм. Тайө сизъяс уджалөны. Найө пуысь пуө лэбалөны да корсялөны кырсь улын олысь гагъясөс. **Вөрса лэбачъяс позъялөны ас кодйөм горсийө.**

Сера сизъяс олөны лыска пуа вөръясын. Тани найө пөткөдчөны коль көйдысөн. Сёяныс кө тырмымөн, чужанінас и төвйөны. А тшыг воясө кынөмпөтсө перйөм могысь лэбзьывлөны лунвыв муясө.

Гожөмнас сера сизь куталө быдсяма гагйөс да пуясөс розьөдлысь номыръясөс. Арнас нетшкө пуяс вылысь кольяс да пылльө найөс. Тулыснас сизь кытшөн розьөдлө кыз пулысь сямөдсө да чөсмасьө зараваөн.

А. Ракин серти

• 1. Мый висьталөма сизь йылысь?

2. Аддзы *МЫЙ ВӨЧӨ?* юалөм вылө вочавидзысь кывъяс.

3. Гиж төдчөдөм сёрникузясө, визьнит подувпас да юөрпассө.



Зарава – тулысын кыддзысь виялан ва; кыз пу ва.

Пыллыны – чирйыны, кышйыны, весавны.

38 удж. Лыдды.

Сьöd сизь – войвывса сизьяс пöвстын мед-ся ыджыд лэбач. Сылön тушаыс сьöd, юр вылыс гöрд. Тшöкыда паныдасьлö пожöма вöрын. Пуысь сийö корсьö аслыс сёян. Öжын кодь нырнас кодйö горс.

- 1. Висьтав, мый выльсö тöдмалін сизь йылысь.
2. Лöсьöдчы гижны диктант.



Öжын – паз писькöдан, розь вöчан ёсь йыла кöртысь вöчасянтор.

39 удж. Лыдды Эдуард Тимушевлысь кыв-бурсö. Висьтав, кутшöм буртор вöчö сизь.

Сизь

Тотшкö, тотшкö пуö сизь.
Оз тай юрыс сылön вись.
Оз тай кольмы сылön юр.
Тöда, сизьыд вöчö бур!

Пуысь корсьö номыр-гаг,
Медым сöстöм вöлі яг.
Быдмысь вöрыс мед оз вись,
Со и тотшкö пуö сизь.

- Содты лöсялана кывъяс: Яг (кутшöм?) сös-тöм, ..., ..., .

40 удж. Лыдды текстсö.

Пипуö сатшкысьöма сизь. Сійö сьөлöмсянныс клёнöдчö. Мича, тшап лэбач. Юрыс да мышкуыс сьод, юрбöрас – гöрд чут, а сьод бордъяс вылас – еджыд визьяс. Гыжъяснас кутчысьöма пуö, мыджсьöма чорыд бöжнас да дугдывтöг тотшкөдчö ёсь нырнас. Зільö, тэрмасьö. Вöрсö тшыкөдысь гаг да пучöй корсьö. Оз öд прöста сійöс шуны вöрса докторөн.

С. Раевский серти

- 1. Кызди гижысь серпасалöма сизьöс?
- 2. Мыйла сизьöс шуöны вöрса докторөн?
- 3. Аддзы текстысь **клёнöдчö** кывлы матын вежöртаса кыв.
- 4. Гиж медводдза сёрникузясö, визьнит подув-пассö да юөрпассö.

41 удж. Лыдды тэрыба Геннадий Юшковлысь кывпесансö.

Пуыс сись,
Пуас сизь.

Пусö сизьдö,
Розыс письтö.

- Аддзы кывпесанысь **ропмунöм** кывлы матын вежöртаса кыв.



42 удж. Лöсьöд кывбур.

... .. сизь
... .. дízь!



ШЫ ДА ШЫПАС



Анбур

43 удж. Лыдды кык ёртлысь ворсөмсö да ворсышт на моз.

ВАНЯ: – Кутшöм шыпас сулалö **й** шыпас водзын?

МИША: – **Й** шыпас водзын сулалö **чута** **і** шыпас.

ВАНЯ: – Кутшöм шыпасъяс костын сулалö **г** шыпас?


МИША: – **Г** шыпас сулалö **в** да **д** шыпасъяс костын.

44 удж. Лыдды шыпасъяссö.

о, к, р – □□□ ö, т, в – □□□ е, з, г – □□□

- 1. Сувтöд шыпасъяссö анбур серти да лыдды.
- 2. Шыпасъясысь артмöд кывъяс да гиж найöс.
- 3. Прöверит уджтö.

45 удж. Видзöд серпасъяссö.



- 1. Шу куим пемöс ним, инды лöсъявтöмсö.
- 2. Гиж нимъяссö анбур серти.

3. Кутшөм шыпас нимъяс «дзедсьөмаөсь» пемөс нимъясө? Висътав таdzi: **Йөра** кывйө дзедсьөма «**йө**» шыпас.

4. Прөверит уджтө.

5. Мөвпышт, кутшөм кывйө вермас дзедсьыны «**гө**» шыпас.

46 удж. Шу шыпасъяссө.

б г ❄ тш ф ❄ п с ❄ г дж

- 1. Анбур серти содты кольөм шыпасъяссө.
- 2. Төдмалөм шыпасъяссьыс артмөд пемөслысь ним да гиж.



47 удж. Төдмав юржуглансө.

Тайө кывъяс **медводдза** шыпасыс анбурын сулалө **п** да **с** шыпасъяс костын; **мөд** шыпасыс – **ф** шыпас водзын; **көймөд** шыпасыс – **ц** шыпас бөрын.

- 1. Уськөд төд вылад анбур да төдмав кывсө.
- 2. Гиж кывсө, тайө кывнас лөсьөд сёрникузя.
- 3. Прөверит уджтө.



48 удж. Уськөд төд вылад анбур да уджышт ёртыдкөд.

- 1. Шу согласнөй шы, а тэнад ёртыд медым шуас шыпас нимсө.

2. Шу анбурьсь кутшöмкö шыпас, а тэнад ёртыд мед шуас анбурын водзö сулалысь шыпассö.

3. Шу параа гора согласнöй шы, а ёртыд медым шуас параа гортöм согласнöй шы.

49 удж. Шу шыпасъяслысь нимсö.

ж з і й л м о п

- 1. Тöдмав кольöм шыпасъяссö.
- 2. Тайö шыпасъяссьыс артмöд кыв да гиж.
- 3. Прöверит уджтö.



50 удж. Лыдды рочөн пемöс нимъяссö.

Медведь, олень, горностай, лось, норка, выдра, лиса, белка, куница.

- 1. Велöдчан небöгын (140 л.б.) сетöм «Комиа-роча кывчукöр» серти комиöд пемöс нимъяссö.
- 2. Пемöс нимъяссö гиж анбур серти.

51 удж. Лыдды кывбурсö да велöд наизусьт.

Коми анбур

Коми анбур миян эм,
Уна пöлöс шыпас сэн.

А да Бö, да Вö, Гö, Дö –
Медся водзö сувтöдö.

Е да Ё, да Жö, да Зö –
Тöдны колö нельнансö.

Ыджыд И да чута ï –
Мед ог вунöдöй и ми.

Йö да Кö, да Лö, Мö, Нö –
Абу со и ылынöсь.

О да Ö, да Пö, Рö, Сö –
Адзим сэсся водзöсö.

Эз кö вöвны Тö да У,
Мукöд кывсö он и шу.

Колöны и Фö, Хö, Цö
Йöзысь пырöм кывъясö.

Оз на тырмы Чö ни Шö,
Он кö содты нöшта Щö.

Чорыд пас Ъ да небыд пас Ь
Уна коми кывйын ас.

Велöдöны Ы да Э,
Мед он сорав ыб да эрд.

Но а помас Ю да Я,
Быттö орччөн ю да яг.

Г. Юшков



Гласнӧй шыяс да шыпасяс

52 удж. Видзӧд серпасьяссӧ.



- 1. Кутшӧм пемӧсьясӧс серпасалӧма?
- 2. Шу пемӧс нимъяссӧ. Кутшӧм шысянь заводитчӧны пемӧс нимъясыс?
- 3. Гиж пемӧс нимъяссӧ да визьнит гласнӧй шыпасьяссӧ.

53 удж. Лыдды.

сь дб ж в з рд в рд сь

- 1. Кутшӧм шыпасьяс «вошӧмаӧсь»?
- 2. Комиӧд пемӧс нимъяс: горноста́й, бурунду́к, крот.
- 3. Содты гласнӧй шыпасьяс да гиж кывъяссӧ.
- 4. Прӧверит уджтӧ.

54 удж. Лыдды.

Кӧр – к р, руч – р ч, кынь – к нь,
сан – с н, сизь – с зь.

- 1. Содты гласнӧй шыпасьяс да артмӧд выль кывъяс.

2. Висьтав, мыйён торъялөны гласной шыпассө вежөмөн артмөдөм кывъясыс.



Кынь – ручлөн кодь куа звер, ёнджыкасө олө тундраын.

Сан – сьөдовруд гөна, кызкодь дженъидик кока, дона куа вөрса пемөс.



55 удж. Лыдды гижөдсө.

Лөсьыд жө нин ошкыдлы төвнад гуад куйлынытө. Некутшөм шог абу Михайлөыдлы. Варгыль кокаыдлы оз ков тапикасьны вөрөд да корсьны сёян. Куйлө сийө да казтылө кольөм вося чөскыд вотос сёйөмсө.

- 1. Кыдзи мөд ног текстас шуөма ошсө?
- 2. Гөгөрвоөд, кыдзи йитчөмаось өта-мөдыскөд сёрникузясыс.



56 удж. Лыдды ош йылысь.

Ош – ён да ыджыд вөрса пемөс. Сийө кузь да чорыд руд гөна, пельыс ичөт. Кокъясыс кызөсь, кузь да ёсь гыжъяса. Ошкыд зэв тэрыба котралө, бура сулалө бөръя лапаяс вылас, пелька кайө пуяс вылө.

- 1. Аддзы текстысь **тэрыба** кывлы матын вежөртаса кыв.
- 2. Лөсьөд ош йылысь текст-серпас.



57 удж. Лыдды ош йылысь кык нӧджыв.

Шоныд пася, варгыль кокыс,
 Скӧрмас – мурӧстас зэв лёкысь.
 Арын сійӧ векджык пӧт:
 Сейӧ лежнӧг, пув да чӧд.
 Ветлӧ ягъясӧд, оз вош
 Збой кӧзяин, нимыс

А. Попов

Тӧвбыд нискӧ-узьӧ гуын,
 Ур моз вермӧ кайны пуӧ,
 Вӧрті ветлӧдлӧ, оз вош –
 Тайӧ варгыль кока

Е. Мартынов

- 1. Висьтав, мый нӧджывъясас ӧткодыс, а мый торъяланаыс.
- 2. Лӧсьӧд ош йылысь нӧджыв.



Согласнӧй шыяс да шыпасъяс
Гора да гортӧм согласнӧй шыяс

58 удж. Видзӧд серпасъяссӧ.



байдӧг



юсь



дозмӧр

- 1. Висьтав, кутшӧм лӧбачьясӧс серпасалӧма.

2. Гиж сөмын согласной шыпасянь заводит-чысь кывъяссö слогъяс вылö юкөмөн.

3. Гижөм кывъясыс визьнит согласной шы петкөдлысь шыпасъяссö.

4. Аддзы лөсявтөм кывсö.

59 удж. Лыдды кывъяссö.

Бур – пур, гыр – кыр, дар – тар, жар – шар, зыр – сыр.

• 1. Мыйөн кывъясыс торъялөны öта-мөдсыс?

2. Кутшөм параа гора да гортөм согласнойяс тэ төдан?

3. Гиж кывъяссö да визьнит параа гора да гортөм согласнойяссö.

4. Бөрийы кык кыв да лөсьод наөн сёрникузяяс.



Гыр – ид да мукөд сикас тусь посньөдлан да пызь вөчан кыдз доз.

Кыр – вывтасін, джуджыдін; крут чой.

60 удж. Лыдды гижөдсö.

Дозмөр – тайö пөтка. Гөныс пемыдруд, сылыыс да зобйыс сьод. Сылі улас тош кодь кузь гөн. Нырыс крукыля. Бөж помыс зыр кодь гөгрөс.

• 1. Төдмав текстыслысь сикассö.

2. Кутшөм кывъяс отсалөны серпасавны дозмөрөс?

3. Гиж кывъяс, кӧні эмӧсь: 1) сӧмын гортӧм согласнӧйяс; 2) сӧмын гора согласнӧйяс.

4. Прӧверит уджтӧ.

61 удж. Лыдды кывъяссӧ.

Ном, зі, вурдысь, чирк, юрсигусь, черань, номыр.

• 1. Гиж кывъяссӧ ӧта-мӧд бӧрсяыс сідзи, медым шыпас лыдыс вочасӧн содіс.

2. Аддзы лӧсявтӧм кыв.

3. Визьнит кывъяс, кӧні эмӧсь и гора, и гортӧм согласнӧйяс.

4. Прӧверит уджтӧ.

62 удж. Инды тырмытӧмторъяс.

1) Челядь вӧчисны лым **сой**. 2) **Рачысь** петӧ тшын. 3) Кык вок керъясысь вӧчисны **бур**.

63 удж. Лыдды кывбурсӧ.

Сылӧн вывті тэрыб кокыс.

Ӧдйӧ суӧдӧма вокӧс,

Коді нуис руля **гӧгыль**.

Сыысь артмӧма сӧй **кӧкыль**.

А. Попов

• 1. Орчӧд тӧдчӧдӧм кывъяссӧ. Мыйӧн найӧ торъялӧны?

2. Гөгөрвоод кивъясылысь вежортассо.
3. Висьтав гора да гортом согласнойяслысь тодчанлунсо.

64 удж. Тодмась Алексей Поповлон кивбурон.

Ышмысь шыпас

Челядь, эскöй кöть тi энö,
Дзикöдз шемöс босьтiс менö.
Алфавитысь пышйис шыпас,
Вöчис дивö уна сикас.



Оз куж öшйынысö инас –
Медводз уськөдчис ай динö,
Кодлön киас вöли **чер**.
Öнi, видзöд, кутö **кер**.

Шыпас пышйис карта сайё.
Сё дивёйд! Мый нё тайё?!
Сэні мудйысис од **пöч**,
Öні коканасьö **кöч**.

Со нин дзерödöма чойöс,
Кутчысьöма сылы сояс.
Вайö вöлі чоюк **йöв**,
Öні киас кутö **кöв**.

Сэссия локтіс мамö дорö,
Весиг отсасьыштны корö.
Мамö печкис небыд **шöрт**.
Сыысь шыпас вöчис **кöрт**.

• 1. Аддзы **вилыш**, **шензьöм** кывъяслы матын вежöртаса кывъяс.

2. Мыйла гижысьыс шыпассö шуöма ышмысьöн?

3. Висьтав, мыйла колöны мян сёрниын согласнöй шыясыс.

65 удж. Мичаа лыдды Юрий Васютовлысь кывбурсö. Висьтав, кутшöм тöдчанлуныс гора согласнöйяслөн тайö кывбурас.

Дурысьяс
Петук сорсөн
Курöг ворсö:
Дрин-дрин, дрин-дрин!





Опорной кивьяс. План

66 удж. Лыдды висьтсö.

Медводдза чери



Тöрытсаянь нин **Ваня** дасьтис **шати**, корсис нидзув. Водз асыв тöдса туйöд зонка зiля восьлалис **вадорö**. Сийö дасьтис пукаланiн да мöдiс **вуграсьны**.

Ваня синсö эз вештыв **таб** вывсьыс. Со и вöрзьыштiс табйыс, а сэсса кутiс ворсны. Зонка лэптыштiс шатинсö вывлань. Вугырö пысасьöма гöрд бока, сьöд визя **ёкыш**. Тайö Ванялөн **медводдза чери!**

Ванялөн сьöлöмыс ломалис **радлунöн**. Сийö тэрыба котöртiс гортас. Рытнас ставөн панялисны чöскыд **юква** да аттьöалисны зонкаöс.

- 1. Инды висьтыслысь темасö да шöр мöвпсö.
- 2. Лыдды тöдчöдöм кивьяссö. Позьö-ö шуны найöс опорной кивьясөн? Мыйла?

3. Вайөд матын вежөртаса кывъяс панялісны кывлы.



Сьөлөмыс ломаліс радлунөн; синсө эз вештив.

БОСЪТ ТӨД ВЫЛАД!

Опорной кывъяс – сійө текстын медся төдчана, колана кывъяс. Тайө кывъясыс отсалөны гөгөрвоөдны текстлысь темасө, сюрөссө да шөр мөвпсө.

Опорной кывъяс отсалөны лөсьөдны текст.

Текст юкөнъяслы позьө сетны ним. Нимъясыс артмө **план**. План да опорной кывъяс серти кокни висътавны ас кывйөн текстыслысь сюрөссө.

67 удж. Лыдды план.

- 1) Ванялөн вадорын вуграсьом.
- 2) Вугырө пысасьөма ёкыш!
- 3) Чөскыд юква.

• 1. Лыдды висътсө выль пөв да инды текстлысь заводитчөмсө, шөр юкөнсө да помсө.

2. Орччөд плансө «Медводдза чери» тексткөд.

3. «Медводдза чери» висътысь гиж опорной кывъяссө.

4. Опорной кывъяс да план серти, небөгө видзөдтөг, висътав текстыслысь сюрөссө.

5. Отсалісны-ө тэныд опорной кывъяс да планыс лөсьөдны висътсө?



68 удж. Лыдды кывбурсö.



Чери кыйöм

Талун чеччим
Водзсьыс-водз,
Чери кыйим
Ме да вок.
Уна чери шедіс,
Видзöд:
Ыджыд мык
И нöшта ичöт,
Сэссия ёкыш,
Сэссия ёді,
Пöшти килограмма коді,
Сир на содты,
Оз кö мын,
Куим кельчи, öти сын...
Ок, и уна чери кыйим
Миян керкадорса тыысь!
Нöшта унджык
Эськö вермим.
Сöмын другысь
Ёна зэрмис.

П. Бушенев

- 1. Лыдды кывбурсö мöдысь да артышт, кымын чери кыйисны кык вок.
- 2. Чери кыйöм йылысь лöсьöд висьт.
- 3. Став кыйöм черисö-ö петкöдлöма серпас вылас? Висьтав, кутшöм чери оз тырмы.

69 удж. Лыдды текстсö да лöсьöдчы гижны диктант.

Рома батыскöд радейтö чери кыйны. Öти асылö найö мөдöдчисны Печора юлань. Тайö юыс джуджыд да паськыд. Сэни эм уна чери. Ю дорын кыкөн пукалісны рытöдз. Гортö найö вайисны уна чери.

70 удж. Лöсьöдчы гижны юрвежысь.

И кор шедіс меным ёкыш,
Муртса черисö эг окышт.

В. Лодыгин

- 1. Кывпесансö босьт юрвежад да гиж.
- 2. Прöверит небöг серти.



Слог

Кывъяс визьысь визьö вуджöдöм

71 удж. Лыдды слогъяссö.

ва	ныш	чи	дöг
кыр	рыш	бай	пан

- 1. Артмöд слогъяссьыс кывъяс.
- 2. Аддзы лöсявтöм кывсö.
- 3. Гиж кывъяссö анбур серти.

72 удж. Лыдды Василий Лодыгинлысь кыв-
бурсö.

Жонь

Ы влавылын кöдзыд:	П елысь этша лоис,
Кылö тринь да тронь.	Вöрас нур оз шед.
Увъяс костöд жöдзö	Со и сиктö воис,
Мича лэбач – жонь.	Сёян корсьны мед.

- 1. Кызди мöд ног позьö шуны «жонь жöдзö»?
- 2. Гиж торйöдöм кывъяссö слогъяс вылö юклö-
мөн.



Нур – сёян.



73 удж. Лыдды рочөн лэбач нимъяссö.

Лебедь, малиновка, воробей, соловей, клёст,
орёл, дрозд-рябинник.

Отсöг кывъяс: **уркай, кутш, пелыськай,**
юсь, колипкай, öмидзкай, пышкай.

- 1. Комиöд лэбач нимъяссö да гиж.
- 2. Кывъяс вылас лыдпасөн инды слог лыдсö.
- 3. Висьтав, мыйла лэбачьяссö нимтöмаöсь
тадзи: **пелыськай, öмидзкай.**

74 удж. Лыдды лэбач нимъяссö.

Гулю, джыдж, дзодзöг, көк, пинькай, каля.

- 1. Гиж кывъяссö слогъяс вылö юклöмөн, мед позис вуджöдны визьысь визьö.
- 2. Гиж нöшта öти слогысь артмём лэбач ним.
- 3. Прöверит уджтö.



Пинькай – мичаа сьылысь гöрд бока вöрса лэбач.

75 удж. Лыдды сёрникузяссö.

1. Мелі шонді ассьыс югөръяссö койис му вылö. 2. Вöрса ордым вайöдіс мянöс ёль дорö. 3. Киссьём тывнад черитö сьökыд кыйны. 4. Вазжөн кыйсьысьыд некор абу торклöма вöрпаыдлысь олöмсö, абу кыйлöма ичöt пьяна звер-пöткатö.

- 1. Аддзы й шыпаса кывъяс.
- 2. Висьтав, кыдзи позьö найöс вуджöдны визьысь визьö.
- 3. Прöверит уджтö.



76 удж. Лыдды кывъяссö.

Воис, төв, кöдзыд, усис, лым, небыд, эрдъяс, эшкынөн, вольсасисны, еджыд, ю, йиөн, тупкысис, кыз, челядь, лыжиөн, да, исласьöны, даддьөн.

- 1. Позьö-ö лыддьöмторсö шуны текстөн?
- 2. Лöсьöd текст да юрнимав сійöс.
- 3. Содты ассьыд некымын сёрникузя төв йылысь.
- 4. Прöверит уджтö.



Текстлөн сикасыяс

77 удж. Лыдды куим текст. Быд гижөдлысь висьтав могсö.

Лэбачкөд аддзысьлөм

Воккөд ме ветлі вөрö.
Лызьөн мунны вöлі кокни.
Воис козъя вөр.

Коз пу дорö сувтыштiм
шойччыштны. Пу гөгöрыс
лымйыс писти сера кодь.
Друг меным пу вывсьыс
юр вылö коль усис. Вөлöм-
кö, уркай кольсö öктö да
шыблалö муас.

Гортö мунигөн бара
сувтыштлiм коз пу дорад.
Тани кольöм кöйдыснас
чöсмасис нин ур. Сийö
казялис мянлысь матыстчöмтö да
вирдыштiс-
пышйис вөрö.



Уркай

Ме босьтi бинокль да видзöдлi: коз пу вылын
пукалис лэбач. Тайö вөлöма уркай – кöдзыдысь
повтöм лэбач.

Крукыля гөрба нырыс крестасьöма. Паськöмыс
мича: морöсыс вижовгöрд, мышку вылыс кöнтусь
сера, бöжыс чим съод.

С. Раевский серти

Мыйла уркайсö тадзи шуöны?

Козъя вöрысь тшöкыда позью казавны креста ныра мича уркайсö. Мыйла нö тайö лэбачсö тадзи шуöмаöсь?

Уркайыд радейтö коз кольлысь кöйдыссö. Лун-лун лэбалö вöрти да уръяс моз корсьö коль. Шыран кодъ ёсь нырнас орöдас кольтö да чашкöдас сийöс. Сэсся, пу вылас мыджсьöмөн, перъялас кöйдыссö. Чöскыд кöйдыснас нуръясьыштöм бöрын кольсö шыбитас. А кöйдыс коляснас ур на чöсмасьыштас.

- 1. Видзöд таблица.

Текст-юöртöм (висьт)	Текст-серпас	Текст-мöвпалöм
<i>Мый лоис?</i> Лэбачкöд аддзысьлöм.	<i>Кутшöм?</i> Уркай.	<i>Мыйла?</i> Мыйла уркайсö тадзи шуöны?

2. Кутшöм юалöм лöсялö быд текстлы: *мый лоис? кутшöм? мыйла?*

3. Мый серти позью тöдмавны текстыслысь сикассö?

4. Висьтав текст сикасьяс йылысь.



Писти – ваболльöн кисьтöм вуджан висьöмысь кучикö кольöм туйяс.

Кöнтусь – джуджыда быдмысь турун (пыш) кöйдыс, сыысь вöчöны вый.

БОСЪТ ТӨД ВЫЛАД!

Текстъяс торъялөны өта-мөдсьыс.

Текст-юөртөм висьталө кутшөмкө лоөмтор либө вөвлөмтор йылысь сьөрсьөн-бөрсьөн, вочавидзө *МЫЙ ЛОИС?* юалөм вылө.

Текст-серпас стөч да мича кывъясөн серпасалө предметсө, вочавидзө *КУТШӨМ?* юалөм вылө.

Текст-мөвпалөм висьталө лоөмторлысь помкасө: *МЫЙЛА ТАТШӨМТОРЙЫС АРТМИС?* Вочавидзө *МЫЙЛА?* юалөм вылө.

78 удж. Лыдды Степан Раевскийлысь уркай йылысь текст-серпас. Гиж текстлысь мөд юкөнсө да визьнит вуджөдны позьтөм кывъяссө.

79 удж. Лыдды куим велөдчысьлысь сёрни темаяссө.

ДИМА: – Кызди ми төждысим лэбачьяс вөсна.

ӨЛЬӨКСАН: – Жонь – мича лэбач.

ВАНЯ: – Мыйла лэбачьяслы төвнас колө отсавны?

• 1. Инды текст юрнимъяслысь өткодьлунсө да торъялөмсө.

2. Кутшөм могөн сёрнитис быд велөдчысь?

3. Мый йылысь висьталас Дима?

4. Кутшөм текст-серпас дасьтас Өльөксан?

5. Кутшөм помка вайөдас Ваня төвся кадө лэбачьялы отсөг йылысь мөвпалана текст дасьтигөн?

80 удж. Лыдды текстъяслысь заводитчөмсö.

Дима да Ваня вöчисны лэбачьяслы сёян пöв. Медводз дасьтисны фанера да пöвтор.

Ме вöчи лэбачьяслы сёян пöв да öшöдi кыз пу вылö. Сёяниö лэбзис жонь. Сэтшöм жö нин мича тайö лэбачыс!

Сёр арын уна лэбач мöдöдчö ыли туйö. Мыйла öтияс кольччöны миян войвылын, а мукöдьяс лэбöны шоныдiнö?

• 1. Инды текст юкөнъяслысь öткодьлунсö да торъялöмсö.

2. Тöдмав, кутшöм юалöм позьö сетны быд текстлы: *МЫЙ ЛОИС? КУТШÖМ? МЫЙЛА?*

81 удж. Лыдды Пантелеймон Образцовлысь кывбурсö.

Шонид сылөн горсъя поз,
Уркай вуджны кужö.
Медся-медся веж мороз
Уркайпи көн чужö.

Комиöдiс И. Вавилин

- 1. Гиж сёрникузяссö сiдз, мед артмис кывбур.
- 2. Прöверит уджтö.



Текст-юөртөм

82 удж. Лыдды висьтсө. Инды текстыслысь темасö да шөр мөвпсö.



Ёртасьём

Лабутнöй Буско пон да Прошка нима вильыш каньпи олісны ладөн. Каньпи ывлаын вильшасьö-котралö, а понйыд сы вылысь синсö оз лэдзлы.

Öтчыд Прошка чеччыштіс джынвийö тупкөм ляпкыд ва пельса вылö. Кага руа каньпиыд и польскысис ваас. Буско квати тіс вомнас вильыш-позтö да перйис пельсасьыс.

Кильчö бокын сулаліс брөд ва каньпи да лапйөдліс синсö. Буско нюліс Прошкалысь көтасьём гөнсö да дивитіс ёртсö.

• 1. Кызди гөгөрвоан: «Понйыд сы вылысь синсö оз лэдзлы» сёрникузя?

2. Кызди мөд ног висьтас шуöма каньписö?

3. Вайöd ышмысь, брöd ва кывъяслы матын вежöртаса кывъяс.

4. Кутшöм лоöмтор йылысь висътавсьö тайö текстас?

5. Кутшöм могөн висъталысьыс юöртö каньпикöд лоöмтор йылысь?

6. Мыйла висътыслы сетöма татшöм ним?

7. Позьö-ö Бусколысь да Прошкалысь öтувъя олöмсö шуны ёртасьöмөн?

8. Кывлин-ö тэ пемöскост ёртасьöм йылысь? Висътав та йылысь.



Кага руа.

83 удж. Лыдды.

Повзьödчысь

Аннушлөн бать-мамыс мунисны кино вылö. Нывка чукöртис чачаяссö. Сэсся мичаа тэчис найöс джаджйö, пöрчысис, кусöдис бисö да водис узьны.

Друг керкаын кыліс кутшöмкö шы: гирс-гурс, гирс-гурс. Аннуш повзис, эшкыннас топыда гаровтчис да юр вывтіыс шебрасис. Дыркодъ нин коли кадыс. Гирскöмыс эз дугды.

Аннуш вештіс эшкынсö, звирк чеччис да биасис. Сэсся видзöдліс паччөрö. А сэнi асланыс кысукыс ворсö тыртöм сакар кудйөн.

Е. Козлова серти

- 1. Төдмав текст сикассө.
- 2. Кутшөм лоөмтор йылысь висьтавсьө текстас?
- 3. Аддзы лоөмторйыслысь заводитчөмсө, сөвмөмсө, медтөдчанаинсө да помсө.
- 4. Вайөд **гаровтчис** кывлы матын вежөртаса кыв.
- 5. Гиж текстысь воддза кык сёрникузясө, визьнит сюрөса юкөдсө.
- 6. Прөверит уджтө.

ВОСЬТ ТӨД ВЫЛАД!

Текстын петкөдлан лоөмторйыс вермө лоны серамбана, сьөлөм вөрзьөдана, сьөлөмө йиджтысяна. Висьталысьыс лоөмтор йывсьыс юөртө сідзи, медым кывзысьыс гөгөрвоис висьтыслысь сюрөссө.



84 удж. Уськөд төд вылад кутшөмкө лоөмтор да лөсьөд сы йылысь висьт.

85 удж. Дасьтысь да гиж диктант.

Кысуклы гажа

Кысуклы вөлі гажтөм. Сійө котөртис паныд сулалысь керкаө. Сэні оліс нывка. Найө радейтисны ворсны өтлаын.

Нывка сунис помө көрталіс кабала да пондіс котравны. Кысук котраліс нывка бөрся. Тадзи сійө

коксö вынсьöдiс да гыжсö ёсьтiс. Регыд каньпилы
лои гажа.

В. Климов серти

86 удж. Видзöд таблица да серпас. Шуав параа
чорыд да небыд согласнöй шыяс.



[д]	[з]	[л]	[н]	[с]	[т]
[д']	[з']	[л']	[н']	[с']	[т']

87 удж. Лөсьöd слогъяс содтöмөн кывъяс да гиж.

Зэ-□□, □□-ні, Ни-□□, та-□□, □□-тя.



88 удж. Лыдды роч кывъяссö.

Репа, смородина, дождь, карман, летит, низкий, костяника, четыре, дорога, тапочки.

- 1. Комиöd роч кывъяссö.
- 2. Быд кывйын торйöd медводдза согласнöй шысö да висътав, кыдзи сійö кылö.
- 3. Гиж öти столбикö параа чорыд согласнöя кывъяс, мöдö – параа небыд согласнöя кывъяс.
- 4. Прöверит уджтö.

89 удж. Лыдды Нина Куратовалысь кывбурсö.

Тöв

Бара локтіс кöдзыд тöв,
Дурö вой тöв вывтi скөр.
Век жö тöвсьыд ме ог пов,
Лымъя эрдсьыс радлö лов!

- 1. Кыдзи гөгөрвоан «Дурö вой тöв вывтi скөр» сёрникузя?
- 2. Орчöд: **локтіс кöдзыд тöв, дурö вой тöв.** Кутшöм вежортасыс **тöв** кывлөн?
- 3. Аддзы кывъяс, кöні медводдза шыыс – параа чорыд согласнöй.




Небыд пас (ь) кыв помын да кыв шӧрын



90 удж. Тӧдмав юржуглансӧ.

- 1. Вежӧртас сертиыс тӧдмав кывъяссӧ:
 - 1) Кӧр либӧ йӧра ку, кодӧс вольсалӧны узьланінӧ либӧ даддьӧ.
 - 2) Еджыд вужъя, морков кодъ коръя, кузь гӧна заа быдмӧг.
 - 3) Вӧсни ныра, кузь пашкыр бӧжа вӧрса пемӧс.
 - 4) Руч сяма куа звер, ёнджыкасӧ олӧ тундраын.
 - 5) Юдорса еджыд лӧбач.
 - 6) Гӧрд морӧса медся ичӧт войвыв лӧбач.
 - 7) Шоныдінын тӧвйысь кузь вӧсни голяа, еджыд либӧ сьӧд гӧна вавывса ыджыд лӧбач.



2. Тӧдчӧдӧм визысь лыдды вӧрса пемӧслысь

ним.

3. Кывкудйысь тӧдмав кывйыслысь вежӧртассӧ да пемӧс нимнас лӧсьӧд сӧрникузя.

91 удж. Видзӧд серпасъяссӧ да лыдды кывъяссӧ.



[вӧркан'] вӧркань



[кын'] кынь



[низ'] низь

- 1. Орчөд гижөдъяссө. Мыйон найо торъялөны?
- 2. Гиж кывъяссө. Колана шыпасъясөн петкөдлы кыв помын согласнойыслысь небыдлунсө.




92 удж. Лыдды нөдкывсө да төдмав.

Синмыс гөгрөс, нырыс ёс□,
 Лэбачьяскөд лэптө кос□,
 Пемыд войясө оз уз□.
 Тайо, дерт жө, лоо

А. Туркин

- 1. Гиж нөдкывсө колана шыпасъяс содталөмөн.
- 2. Нөдкыв помас гиж лэбачлысь нимсө.

93 удж. Велөдчы лыддыны кывбурсө тэрыба.



Сизим сьөла

Яла вылысь сизим с...өла
 Лэбзис-пуксис пелыс... вылө.
 Кокаліс да кокаліс,
 Öти тус...өдз помаліс.

И. Торопов

- 1. Аддзы небыд паса кывъяс.
- 2. Гиж небыд паса кывъяссө, визьнит ь.
- 3. Гөгөрвоод яла кывлысь вежөртассө.



94 удж. Лыдды шусьөгъяссö да гөгөрвоöd.

Кыйтöм сьöлатö эн кушты.

Ручöс кыйöны, но и ручыд кыйсьö.

95 удж. Дасьтысь гижны диктант.

Ань, чибльöг, ньöв, кольта, тьöс, купальнича, пинькай, прать, вольöс, кельöб, пасьтасьö.

• 1. Тöдмав вежöртас сертиыс кывъяс: **кузь пöв, лэбач чукöр, мичаа сьылысь лэбач, виж дзоридзьяса турун, нывбаба, юрси чукöр, няня быдмöг, юан доз, кок улö вольсалöм турун, лыйсян бедь.**

2. Гиж кывъяссö да визьнит параа небыд согласнойяссö.

3. Висьтав, кьдзи петкöдлöма налысь небыд-лунсö.

4. Гөгөрвоöd тöдтöм кывъяслысь вежöртас-сö.



96 удж. Лыдды роч кывъяссö.

Груздь, серебро, ухо, пояс, угол, яйцо, постель, луна, шишка, крыльцо, больной.

• 1. Комиöd роч кывъяссö.

2. Гиж найöс да прöверит. Визьнит ь.



Небыд паса кывъяс визысь визьö вуджöдöм

97 удж. Лыдды висьтсö да лöсьöдчы гижны.

Йöра – пармаын медся ыджыд олысь. Тöлын сийö сёйö бадь да пипу, пелысь да сэтöр. Ай йöралöн тöвнас усьö сюрис. Водз тулыснас сийö бөр заводитö быдмыны.

- 1. Гиж текстсö гөгөрвоодöмөн.
- 2. Визьнит небыд паса кывъяссö.

98 удж. Лыдды Öльöксанлысь висьтсö.

Йöракöд аддзысьлöм (Öльöксанлөн висьт)

Öтчыд ме батькöд ветлі ю дорö. Асывнас видз вывті вöсьлалігөн нимкодясим мöдлапöвса мича вөр-ванас. Ю бокас пестім бипур да пузьöдім чай. Сэтöра чайöн чöсмасьыштöм бöрын заводитім вуграсьны.

Друг ю мöдар боксьыс казялім сьöд чут. Недыр мысти чут пыддиыс бура нин тыдаліс паськыд сюра йöра. Сийö сулыштіс лыа вылас, вöськовтіс юлань, юис васö, пыркнитчис да бөр пырис вөрö.

- 1. Тöдмав текстыслысь сикассö.
- 2. Гиж небыд паса кывъяссö слог вылö юклöмөн визысь визьö вуджöдöм могысь.

99 удж. Лыдды кывбурсö.

Йöра

Кузь кока, сизим вожа сюра, –
Пу костöд аддзи сийöс бура.
И сийö менö бура аддзис,
Но пелысь гөгөр ветлис надзöн.

Том небыд йывсö сейис чöла.
А менам öтка пуля вöли.
Но ме эг лый, кöть верми эськö.
И сийö меным бурö эскис.

Г. Юшков

- 1. Мый верман висьтавны кыйсьысь йылысь?
- 2. Мыйла колö видзны йöраöс?
- 3. Аддзы кывбурысь **ньöжйö** кывлы кык матын вежöртаса кыв.

100 удж. Лыдды кывпесансö тэрыба да босьт юрвежад.

Йöра юрысь Сэссия сюрис
Усис сюрис, Нюрысь сюрис.

Г. Юшков



101 удж. Лыдды висьтсö.

Öти гожся лунö Митрей мунис вöрö тшак вотны. Рылланьыс зэрмис. **Пöльтис** кöдзыд төв.

Друг Митрей кыліс никөстөм. Зонка видзөд-
ліс гөгөрбок. Тшөкыд понөльысь сійө казяліс
йөрапиөс. Детинка **мөдөдчис** гортлань. Йөрапи
вөтчис зонка бөрся. Тадзи найө воисны сиктөдз.

Гожөм чөж йөрапи оліс сиктын. Митрей ёна
төждысис быдтасыс вөсна. Пемөсыд **вынсяммис**.
Арнас сійө бөр муніс вөрө.

- 1. Төдмав текстыслысь сикассө.
- 2. Юрнимав висьтсө.
- 3. Төдчөдөм кывъяслысь гөгөрвоөд гижанногсө
да босьт юрвежад.
- 4. Аддзы текстысь **ёнмис**, **сук** кывъяслы матын
вежөртаса кывъяс.
- 5. Вочавидз юалөмъяс вылө да гиж изложение.
 - 1) Кытчө муніс Митрей гожся лунө?
 - 2) Кодөс казяліс зонка тшөкыд понөльысь?
 - 3) Мый лоис йөрапикөд?
 - 4) Кыдзи сійө веськаліс сиктө?
 - 5) Кыдзи Митрей төждысис йөрапи вөснаыс?
 - 6) Мый пемөскөд лои арнас?



Понөль – посни лыска пуяс.



Е, Ё, Ю, Я – йота гласнөйяс

102 удж. Лыдды кывъяссө да висьтав, кымын
шы кылө төдчөдөм шыпасъяс местаас.

Юква, яла, еджыд, ён, выя, муяс, сёян.

106 удж. Лыдды в аж коми сёян йылысь ги-
жодъяс.

Ляз

Пызьодз изой стокан джын кос льом, котодой
ваон да содтой стокан джын песок. Кык час кеж-
ло пуктой пожсыны пачо. Сэсса содтой кык сто-
кан чуж пызь да ношта пожыштой час джын.
Артмо зэв чоскыд сёянтор. Лязсо позьо вочны кос
чодйысь.

Азя шыд

Дэбыд ваын сорлалой ыджыд пань тыр рокос,
сов да кык ыджыд пань тыр пожналом пызь. Кизьо-
ра гудралой, дас час чож сулодой шоныдинын.
Артмом котассо кизьортой ваон, рудзодой да пу-
зьодой. Сорасас содтой ыджыд пань тыр анькытш
да ид шыдос, солалой да пуой небзытодзыс. Азя
шыдсо сёйигас нокъялой. Нянь да сов!

- 1. Тодмав, кыдзи они пуоны азя шыд.
- 2. Кутшом коми сёян йылысь тэ ношта тодан?
- 3. Лосьодчы висътавны коми йозлон важ сёян
йылысь.



Чуж – пожом, юммодом нянь койдыс, сыысь
вочоны чужва.

107 удж. Видлав шы да шыпас серти нянь
кыв.



108 удж. Лыдды висът заводитчөмсö да помсö.

Заводитчөм: Тэнад пызан вылын куйлö чöс-кыд нянь тупöсь. А кыдзи нö веськаліс нянь тупöсьыс пызан вылö?

Пом: Колö быдөнлы видзны няньсö!

- 1. Лыдды кывъяс: уна йöз, быдмис, идралісны, изісны, пöжалісны, вайисны лавкаö.
- 2. Содты текстлысь шөр юкөнсö.
- 3. Лöсьöд висът «Кыдзи нянь веськаліс пызан вылö?».

109 удж. Лыдды.

Муыд вердö морттö. Му вылын уджалöны-мырсöны уна йöз. Найö быдтöны сю да шобді. Сю пызысь пöжалöны сьöд нянь, шобді пызысь – еджыд нянь. А проса шыдöсысь пуöны чöскыд рок.

- 1. Кутшöм пöжас тэ тöдан?
- 2. Мыйысь пуöны рок?



Согласнöйяс бöрын У да Ю шыпасъяс гижöм

110 удж. Веж кывсö петкöдлöм серти да гиж.

Маша – Машук

Витя – ...

Таня – ...

Зоя – ...

111 удж. Лыдды кывъяссö.

Нюм, дум, сю, туй, Люба, нуны, суюмод, лун.

- 1. Кывъяссö юклы кык пельö да гиж.
- 2. Визънит кывъясын чорыд параа согласной-яссö öти визьон, а небыдъяссö – кыкөн.

112 удж. Гиж колана шыпасъяс содталöмөн.

Дозмөр пувсö зiля сейö,
Гөгөр жуö с...öла, тар.
Т...ри кокнас н...рсö лойö:
Абу муса сылы ар.

М. Лебедев

113 удж. Лыдды текстсö.

Т...ри олö н...рын. Сылөн голяыс, нырыс да
кокыс к...зь, бöжыс дженъыд. Н...рын найö ветлöд-
лöны тшапа, паськыда восьлалöмөн. Арнас тури-
яс лэбöны л...нвылö. Лэбачъяс кузя ливкйöдлöны
да шывгöны йыла вожалан кельöбөн пыдöстөм
енэжöд. Т...лыснас турияс бөр воöны войвылö.

- 1. Вайöд паныд вежöртаса кывъяс **лунвыв,**
кузь кывъяслы.
- 2. Чутъяс местаö содты у либö ю шыпас да гиж.
- 3. Лöсьöд тури йылысь висът.



Кельöб – лэбач чукөр.

114 удж. Дасьтысь гижны диктант.

Тури – ыджыд лэбач. Кокыс кузь, бөжыс дженъыд. Ичотик юрыс кузь ныра. Ньюрын турияс ветлөдлөны тшапа.

115 удж. Лыдды пудъясянкывсö да велөд.

Öтик, кык, куим, нель,
Кöчлы пеляс пырис коль.
Кöчöс мездны локтис тури,
Сылөн кузь нырлы коль сюри.
Кыскис тури пельсьыс коль.
Öти, кык, куим, нель.

Ф. Вокуев



116 удж. Лыдды пудъясянкывлысь заводитчöмсö да помав.

Öтик, кык, куим, нель.
Коз пу йылысь усис коль...



117 удж. Лöсьöд пудъясянкыв «Выль во дырйи вöвлытöмтор» тема серти.

Заводитчöм.	Аддзывлі ме татшöм дивö: Коз пу вылын ...
Шөр юкөн.	?
Пом.	Ставыс тайö збыль, дерт, Он кө верит – мун пет!



Согласнойяе бöрын О да Ё шыпасъяс гижöм



118 удж. Тöдмав юржуглансö.

• 1. Тöдмав кывъяссö налөн
вежöртас серти:


1) Васöд увтасінын лыска
вөр.

2) Виж рöма, гöгрös град выв пуктас.

3) Кык бордъя, кузь ныра лэбалысь гут-гаг.

2. Лыдды тöдчöдöм визысь кыв да гөгөрвоод
сылысь вежöртассö.

3. Гиж тöдмалöм кывъяссö, визьнит **о** да **ё**
шыпасъяс.



Сён – вöрын да видз вылын васöд увтас места.

119 удж. Лыдды текстсö.

Талун Лёнялөн нимлун. Сылы тырис көкъямыс
арös. Нимлун вылас воисны ... ёртъясыс. Нывка-
яс козьналісны ..., а зонкаяс – Лёнялөн пöчыс
пöжалöма пувъя пирöг да черинянь. Ставөн чös-
масисны ... , юисны чай. Сэсса ворсісны ... да
Ставлы вöлі гажа.

• 1. Содты текстас колана кывъяс.

2. Висьтыслы сет ним.

3. Висьтав, кор тэнад нимлуныд. Кыдзи тэ
пасйин ассыд нимлунтö?



120 удж. Видзод серпасъяссö.



• 1. Лыдды кывъяс: Лёня, Ёгор, ёртъяс, лыжиён ордйысьём, тёпкан, тола, дойдіс, нёрпаліс, отсаліс, бурдіс.

2. Серпасъяс да отсöг кывъяс серти дасьты висът.

3. Висътсö юрнимав.

121 удж. Гиж кывъяссö лöсялана шыпасъяс содталöмөн. Лöсьöд кык сёрникузя.

Т...пкö-виялö войтва, с...льгö-визувтö шор, т...льгö-киссьö ва, з...льмуніс-усис йинёнъ.



122 удж. Лыдды чолöмалан гижöд. Содты бур-сиömъяс.

Дона Лёня!

Чолöмала тэнö нимлунён. Сиа дзоньвидзалун, выль вермömъяс лыжиён ордйысьöмын, да

Тэнад Ёгор ёрт.



123 удж. Комиöd.

Сегодня Лёне исполнилось восемь лет. Мама сыну подарила книгу. Отец сделал книжную полку. Сестра Оля нарисовала любимого котёнка. Бабушка испекла вкусный пирог. На столе красивые цветы. Скоро придут гости.

• 1. Лöсьöд висът сы йылысь, кыдзи тэ нимлунасин.

2. Вуджödöm текстысь инды схема дінö лöсялысь сёрникузя:

Коді?

кодлы?

мый вöчис?

мый? .



Согласнойяс бöрын Э да Е шыпасьяс гижöм

124 удж. Артмöд кывтэчасьяс да гиж. Гөгöрвоöд налысь вежöртассö.

Лэчыд (пурт, төв), небыд (лым, кыв), тэрыб (ур, морт), мудер (руч, зон), дэбыд (ва, синва), мелі (мам, шонді), вежöра (зонка, син).



125 удж. Висьтав, кутшöм морт йылысь позьö шуны тадзи: **ур кодь тэрыб, руч кодь мудер.**

126 удж. Лыдды Сергей Куликовлысь кыв-бурсö колана ногөн. Содтав лöсялана шыпасьяс да гиж.

Январ

Тайö төлысьыс з...в кöдзыд.

С...зьдö ен...ж. Гөгöр чöв.

Т...час тола морöсöдзыс

Миян сиктъяс гөгöр төв.

• Вайöд сэзьдö, лөнъ кывъяслы матын вежöртаса кывъяс.



127 удж. Тöдмав юржуглансö.


1	э	
2	э	
3	э	

1. Тöдмав кывъяссö да лыдды выль кыв: 1) морт олöм; 2) кыйсян кöлуй; 3) кымöрысь киссьысь-войталысь ва.

2. Гиж э шыпаса кывъяс.
3. Лыдды тӧдчӧдӧм визысь кыв.
4. Вайӧд матын да паныд вежӧртаса кывъяс нӑр кыв дорӧ.
5. Прӧверит уджтӧ.



128 удж. Лыдды роч кывъяссӧ.



- 1. Комиӧд кывъяссӧ «Русско-коми словарь» отсӧгӧн.
- 2. Гиж коми кывъяссӧ.
- 3. Прӧверит уджтӧ.



129 удж. Тӧдмав юржуглансӧ.

1	е				
2	е				
3	е				
4	е				
5	е				
6	е				

- 1. Лыдды роч кывъяссӧ да вуджӧд:
1 – рябина; 2 – варежка;
3 – картина; 4 – шиповник;
5 – дети; 6 – среда.

2. Бӧрйӧмӧн гиж кывъяс, кӧнӧ е шыпас петкӧдлӧ параа небыд согласнойяслысь небыдлунсӧ.
3. Прӧверит уджтӧ.



130 удж. Лыдды висьтсö.

Менам радейтана небöг (Настялөн висьт)

Менам гортын эм зэв уна небöг. Öти шкапын мам-бать видзöны небöгъяс. А мöд шкапын менам да Оля чойлөн небöгъясыс. Менам да чойлөн небöгъясыс мича серпасаöсь. Меным козьналісны Соломония Пылаевалысь мойдъяс. Мамö карысь вайис нöшта öти серпаса небöг. Прöст кадö ме око-тапырысь лыддя ассым радейтана небöгъяс.

- 1. Уськөд тöд вылад текстлысь аслыспöлöс-лунсö.
- 2. Кутшöм тырмытöмтор казялін висьтсьыс?
- 3. Бурмöд текстсö.
- 4. Висьтав аслад радейтана небöг йылысь.



131 удж. Комиöd текстсö.

Береги книгу

Книга – твой добрый друг. Над созданием книги работают много людей. Нельзя рисовать в книге и вырывать листы. Нельзя погибать страницы книги. Бери книгу чистыми руками. Береги её.

- 1. Гиж комиödömön текстысь мöд сёрникузясö.
- 2. Висьтав, кыдзи тэ видзан ассыд небöгъя-ястö.



Согласнойяс бöрын И да І шыпасъяс гижöм



132 удж. Тöдмав юржуглансö.

1	и		
2	и		
3			і
4	и		ь

1. Вежöртас сертиыс тöдмав нель кыв: 1) йöзлөн оланін; 2) көр кок куысь вурöм көмкот; 3) ма сетысь гут-гаг; 4) вöрын олысь дона куа

ичöt звер.

2. Тöдчöдöм визысь лыдды лэбач ним.
3. Прöверит уджтö.
4. Гиж и да і шыпаса кывъяс.

133 удж. Лыдды да аддзы лöсъявтöм кыв.

Мунны, восьлавны, пасьтасьны, котöртны, ризöдны.

• Кывъяссö веж сідзи, медым найö вочавидзисны *МЫЙ ВÖЧИС?* юалöм вылö:

Вöч та дзи: **Муніс, ...**

134 удж. «Коми орфография кывкудйысь» корсь и-і шыпаса 6 кыв да гиж найöс.

135 удж. Лыдды кывъяссö и да і шыпасъяс содталöмөн.

С...р, ёд..., нал...м, н...а, ч...ми.

Юрс...гусь, з..., с...ргаг, путн...к, н...дзув.

- 1. Гиж кывъяссö коланаинö и да і шыпасъяс содталöмөн.

2. Кутшöм кыв оз лöсяв быд визьын? Визьнит лöсявтöм кывсö.



Чими – сёмга.

Сиргаг – кузь усъяса лы кодъ чорыд кышöда ыджыд сьöд гаг.



А-Я, У-Ю, Э-Е, О-Ё, И-Й шыпасъяс

136 удж. Лыдды кывъяссö.

Ёль, яла, нявда, йи, сюмöд, юкмös, енэж, йирк, иган, гулю, изки, юм, сер.

- 1. Гиж [й'] шыа кывъяссö.
- 2. Прöверит уджтö.



Йирк – пötөлök; **изки** – шыдös либö тусь изöм вылö изйысь вöчöм кык круг; **гулю** – йöз дорын олысь рудовлöz рöма лэбач, позсö вöчö керка вевт улö, вичко йывъясö, сарайясö.

137 удж. Лöсьöдчы гижны кывъяс. Кывъясысь инды орфограммаяс.

Серам, еджыд, тёпкис, ёкмуніс, югыд, нүйт, яндзим, сяльгис.

138 удж. Лыдды сёрникузяяссö.

1) Зэр бöрын жöлöбысь топкö воитва. 2) Енэж-сянь шондi савкйö мелi йугöрсö. 3) Ывлаын кылис гажа сэрам.

- 1. Аддзы öшыбкаяссö да мöвпышт, мыйла найö лоисны.
- 2. Гиж сёрникузяяссö колана ногөн.
- 3. Прöверит уджтö.



139 удж. Лыдды да помав висьтсö.

Сюзьпи

Öтчыд вöрысь ме **казялi** ичöтик сюзьпиöс. Кодкö чегöма сылысь борд пöвсö. Меным жаль лоис лэбачыд. Сюйи сийöс мышнопйö да вайи гортö. Гортын кöрталi дойсö. **Сэсся** вердi шырöм ййөн. Лэбачлы позсö вöчи улöс пытшкö.

Сюзьпи вöли рам да чöv олысь лэбачөн. **Луннас** сийö вугралiс. Рытнас гуляйтiс джоджын. Висьысь лэбач выльысь **велалiс** лэбавны.

Бурдöм бöрын ...

Н. Канев серти

- 1. Босьт тöд вылад тöдчöдöм кывъяслысь гижанногсö.
- 2. Лыдды кывъяссö да содты колана шыпасъяс: сюз...пи, жал..., л...бач, с...йи, с...йö, гул...йтiс, вис...ыс..., выл...ыс... .

3. Веж кывъяссö: казавны – казялі, сүйны – ..., вайны – ..., көртавны – ..., вердны – ..., вöчны –

4. Лыдды висьтсö мöдысь да ас кывйöн висьтав сюзьпи йылысь.

5. Гиж изложение да прöверит уджтö.



Мышноп – мыш вылын новлöдлан мешöк.

140 удж. Лöсьöдчы гижны кылана диктант.

Ягын

Ми ветлім нитшка ягö. Сэтысь сюри уна гоб. Мöдiм гортö. Воис сöдз ваа ёль. Ёль дорсьыс вотiм ельдöг. Ёльсьыс юим кöдзыд ва. Ок и чöскыд жö ваыд жар лунö!



Дз [z'] шыа кывъяс

141 удж. Бөрйы сетöм кывъяс дорö признак петкöдлысь кывъяс.

Видз (*кутшöм?*) паськыд, ..., ...,

Кыдз (*кутшöм?*) пашкыр, ..., ...,

142 удж. Артмöд сёрникузяясысь Михаил Лебедевлысь кывбурсö да лыдды.

Нимкодясö сэтөн
Вежöдöма видз.

Мича турун петö,
Небыд корья кыдз.

- 1. Лыдды кывбурсо колана ногон.
- 2. Босыт сийос юрвежад да гиж.
- 3. Прөверит уджтө.



143 удж. Төдмав юржуглансө.

1		дз			
	2				дз
3				дз	

1. Вежөртас сертиыс төдмав куим кыв:

1) Му пытшти веглясьомон кыскасысь кузь гаг.

2) Ю вылын сөніка ва, йи сувтөм водзвылын артмөм небыд йи.

3) Васөдінын, ты доръясын быдмысь турун.

2. Төдчөдөм визысь лыдды кыв.

3. Гиж дз [z'] шыа кывъяс.



Дж [z] шыа кывъяс



144 удж. Төдмав дж шыпасянь заводитчысь кывъяс.

1	дж		
2	дж		
3	дж		

1. Вежөртас сертиыс төдмав куим кыв:

1) Кер пом; чурка, кодос видзоны улос пыдди.

2) Ю пыдосын джуджыд гуран.

3) Нем виччысьтөг, друг, өдйө.

2. Гиж дж [z] шыа куим кыв.

3. Прөверит уджтө.

145 удж. Ворсышт ёртыдкөд.

Содты джык да шу кывсö: мича – мича-джык, югыд – ..., муса – ..., лонь – ..., паськыд – ..., шыльыд –



Тш [ч] шыа кывъяс



146 удж. Тöдмав юржуглансö.

1	тш		
2	тш		
3	тш		
4	тш		

1. Вежöртас сертиыс тöдмав нель кыв:

- 1) Зэр бöрын петöма уна
- 2) Сук, тшöкыд.

3) Дзик, сразу.

4) Сотчöмысь сынöдын артмöмтор.

2. Гиж тш [ч] шыа нель кыв.

3. Прöверит уджтö.



147 удж. Лыдды нöдкывъяссö да тöдмав.

Му пышттыыс ветлö,
Гöрд шляпа петлö.
Вöрын ичöt зон.
Сийöс тöдан он?

Быдмö пипу бокын,
Кыз да еджыд кока.
Юрыс гöрд да паськыд,
Быттьö ыргөн тасьтi.

А. Ванеев

А. Пархачёв

- 1. Мый öткодъыс нöдкывъясас?
- 2. Лöсьöд тшак йылысь нöдкыв.



148 удж. Лыдды кывбурсö.

Гажа ягын

Гулыд ягын, гажа ягын
Еджыд гобйыс мыйта!
Гулыд ягті, гажа ягті
Час мында и шöйті.

Батьлөн пестер лои тырыс,
Менам – наберушка.
Нöшта ельдög котыр сюрис.
Кытчö найöс воштам?

Мися, майка куля вылысь,
Ог öд кольöй татчö
Ельдөгъяссö, бур зонъяссö.
Батьö шуö: – Вотчы!

Н. Куратова

- 1. Вайöd гулыд кывлы паныд вежöртаса кыв.
- 2. Лöсьöd тшак вотöm йылысь «Гажа ягын» нима висьт.

149 удж. Лыдды тэрыба.

Тшакыс вöрын уна эм.
Зэрöм бöрын петіс тшем.

П. Бушенев

- 1. Велöd кывпесансö наизусьт.
- 2. Гиж юрвежсьыд.



Тшем – сук, тшөкыд.

150 удж. Лыдды.

Батьö солаліс ... да

Мамö косьтіс ..., ... да

- Серпас серти содты колана тшак нимъяс да гиж.



151 удж. Мичаа лыдды кывбурсö.

Косьтан тшак

Зэра кадын сылы бур,

Пыр и мыччас мусьыс юр.

Олö лун, дай олö мöd,

Быдмö вывлань, шог оз тöd

Гөрд шляпаа, вывті тшап, –
Öти кока косьтан тшак.

Е. Тараканова

- 1. Кутшөм косьтан тшакъяс тэ төдан?
- 2. Бөрйы да гиж **тш** шыпаса кывъяссө.



Тшап, ышнясьысь, ыкша, вылө пуксьысь.

152 удж. Лыдды кывбуръяссө да петкөдлы класс водзын.

Вотчысь

Воті ягсер, воті гоб.
Тырис чуман, тырис ноп.
Тырыс тшакыс, оз нин төр.
Майбыр, озыр таво вөр.
Öдва кыски чуман-ноп:
Вот и ягсер! Вот и гоб!

В. Бабин

Гут кулан тшак

Коз увсянь меным мыччысьö,
Зэв ышнясьысь да тшап,
Да, гашкө, весиг виччысьö
Гут кулан мича тшак.
– Босьт менö, – шуö, – сумкаад.
Ме абу сісь, эн пов.
– Зэв мичаа тэ нюмъялан,
Но тэ öд мен он ков.

С. Куликов

• 1. Вайöd **озыр** кывлы паныд вежöртаса кыв.

2. Кутшöм тшак оз позь сёйны?

3. Висьтав, кутшöм тшак солалöны.

4. Кутшöм тшак косьтöны да жаритöны?



153 удж. Серпас серти лөсьöd кык тшаклысь сёрнисö.



**Дз, Дж, Тш шыпаса кывъяс
визьысь визьö вуджödöм**

154 удж. Лыдды кывъяссö.

Катша, вутш, кодзувкот, кутш, джек, джыдж.

• 1. Юклы кывъяссö вуджödöм вылö.

2. Гиж сöмын лэбач нимъяссö, инды шы да шыпас лыдсö.



Кутш – ыджыд хищнöй лэбач.

155 удж. Лыдды.

Öдзöс, нитш, кödзыд, дзоля, еджыд, татшöм, джодж, китшкö.

- 1. Гиж вуджодны позьтөм кывъяссө.
- 2. Вайод **көдзыд**, **еджыд** кывъяслы паныд ве-
жортаса кывъяс.
- 3. Лөсьод өти сёрникузя.

156 удж. Лыдды юалөмъяссө.

- | | |
|--|-----------|
| 1. Мый йөгзё енэжын? | кодзувкот |
| 2. Коді вөчө аслыс оланінсө лыс емысь? | тшак |
| 3. Мый заптө ур төв кежлө? | кодзув |

- 1. Гижөмөн вочавидз юалөмъяс вылө.
- 2. Гижигад дз, **тш** шыпаса кывъяссө юклы ви-
зъысь визьё вуджөдөм вылө.



Йөгзё – дзирдалө, югъялө, пөртмасьё.

157 удж. Лыдды висьтсө.

Кодзувкотъяс – вөр бурдөдысьяс

Пөльыскөд Ваня восьлаліс вөр туйөд. Пөльыс индіс лыс емысь тэчөм ыджыд чукөр вылө:

– Тайө – **кодзувкоткар**, кодзувкотъяслөн ола-
ніныс, лыскысь тэчөм кар. Ок и **уджачөсь** жө
кодзувкотъясыд! Видзөд, **кыдзи** найө тэрмасьёны
весавны вөрсө да бурдөдны пуяссө. Найө бырөдөны
вөрсьыд уна гут-гагйөс. Көні эм кодзувкот **оланін**,
сәні и вөрыс сөстөм. Кодзувкотъясыд ас костаныс
юкөны **уджсө**: өтияс корсьёны сёян, мөдъяс **видзө-**
ны оланінсө.

Э. Полякова



- 1. Төдмав текстлысь сикассö.
- 2. Мый төдмаліс Ваня?
- 3. Мый тэ төдан кодзувкоткар йылысь? Корсь небөгъясысь кодзувкот йылысь гижөдъяс.
- 4. Вайөд уджач, видзöны кывъяслы матын вежөртаса кывъяс.
- 5. Лөсьөд «Мыйла оз позь пазöдны кодзувкот-каръяссö?» текст-мөвпалөм.
- 6. Юклы төдчөдөм кывъяссö визьысь визьö вуджөдөм вылө да гиж.

Вöч таdzi: **Ко-дзув-кот-кар, ...**

- 7. Ас кывйөн висьтав кодзувкотъяс йылысь.
- 8. Прөверит уджтö.



П да Ф шыпаса кывъяс



158 удж. Лыдды. Гиж кывъяссö кык чукөрö.

Телефон, фанера, кампет, тупли, шифер, шкап, пöнар, форточка, картофель.

БОСЫТ ТÖД ВЫЛАД!

Ф шыпас паныдасълö сöмын рочысь пырöм кывъясын. Коми кывйын сійöс вежö **п** шыпас: рочöн **конфёта**, комиöн **кампет**. Орччöд: **сарафан-сарапан, фартук-партук, фонарь-пöнар**.

159 удж. Лыдды сёрникузяяссö.

Педөр уджалö (кöни?) Сійö – сиктса (кодi?) Фаина лысьтö мös. Сійö йöвсö кисьтö (кытчö?)

- 1. Висьтав, кодос шуоны фермерон. Мый сийо вочо?
- 2. Помав сёрникузяссө да гиж найос.
- 3. Чутьяс местаас содтав колана кывъяс: **ферма, фермер, фляга.**
- 4. Прөверит уджтө.

160 удж. Лыдды кывъяссө.

Сарапан, тупли, фуфайка, партук.

- 1. Аддзы лөсявтөм кыв да гиж сийос.
- 2. Висьтав, мыйла оз лөсяв.

161 удж. Корсь пөвсө да лыдды.

флаг	снимайтысь
февраль	дөрапас
фотограф	урасьом

162 удж. Лыдды.

Жешартын эм ...анера вочан завод. ...анерасьыс дасьтöны уна сикас шка..., пызан. Тани уджалö ...етыр дядь. Бура уджалöмысь сылы сетисны премия.

- 1. Мый тэ төдан фанера вочан завод йылысь?
- 2. Гиж чутьяс местаö **ф** да **п** шыпасъяс содталөмөн.
- 3. Прөверит уджтө.



163 удж. Лыдды висьтсö.

Пöжар кусöдöм

Öти гождя жар луно сиктсаяс куртисны медся паськыд видзсö. Скöтлы лои дасьтöма вобыд кежлö бур көрым. Кос турунсö пыртлисны лэбулö.

Рытнас Петыр мөдöдчис йöв флягаясла. Ферма дорті мунігөн сылы нырас кучкис тшын дук. Фермер казяліс лэбувсянь петысь тшын.

Петыр тэрыба ваяліс шорысь ва да киськаліс тшыналысь турунсö. Регыдъя кадөн неминуца вöлі бырöдöма.

• 1. Кутшöм лоöмтор йылысь висьтавсьö текстас?

2. Кызди гөгөрвоан: «*Нырас кучкис тшын дук*»? Орчöд кывтэчасъяс: **нырас кучкис и нырас öвтіс.**

3. Мый позьö шуны фермер Петыр йылысь? Кутшöм сійö?

4. Кызди позьö помавны висьтсö?

5. Дасьты план.

6. Висьтыслы сет мөд юрним.

7. План серти гиж изложение.

8. Прöверит уджтö.



Неминуца – шог, лёктор, виччысьтöмтор.

Лэбув – суръяяс вылын вевта восьсаин.



Нырö кучкис.



К да Х шыпаса кывъяс



БОСЪТ ТӨД ВЫЛАД!

Х шыпас паныдасълö сöмын рочысь пырöм кывъясын. Уна кывйын сійöс вежö к шыпас: рочöн сахар, комиöн сакар. Орчöд: хозяин-кöзяин, кöнюх-көнюк.

164 удж. Лыдды.

1) Доддялöм кöръясöн веськöдлан кузь бедь, öтарсянныс кöрта, мöдарсянныс гöгрöс лы пома.
2) Ыджыд пачö чугун сүйöм да перйöм вылö пу воропа сюр кодь кöрт пома бедь. 3) Тшыксян сёян-юан кöдзыд видзанін.

- 1. Тöдмав кывъяссö да гиж.
- 2. Визьнит ж да к шыпасъяс.
- 3. Прöверит уджтö.

165 удж. Лыдды кывъяссö.

По...од , кол...оз, тепло...од, пету... , ша...та,
су...ар, ду...и, ...алат, ...ор, ку...ня.

- 1. Содты чутъяс местаас к либö ж шыпас да гиж кывъяссö.
- 2. Прöверит уджтö.
- 3. Лöсьöд öти сёрникузя да гиж.

166 удж. Лыдды кывъяссö.

Конюк, плака, завхоз, пастук.

- 1. Инды лöсявтöм кыв да прöверит.
- 2. Лöсявтöм кывнас дасъты сёрникузя да гиж.

167 удж. Лыдды юалöмъяссö.

1. Коді йирсьöдö луд вылын мöсъясöс? 2. Коді дöзьöритö вöвъясöс? 3. Мый позьö артмöдны косьтöм няньысь? 4. Мыйöн вöтлöны доддялöм кöрöс? 5. Мый пасьталö больничаян бурдöдчысь? 6. Кытчö ветлісны челядь?

- 1. Вочавидз гижöмөн юалöмъяс вылö к либö ж шыпаса кывъясөн.
- 2. Гиж öти сёрникузя схема серти.

Мыйысь?

мый вöчöны?

мый? .

168 удж. Лыдды.

1) Сёян видзёны (көнi?) 2) Сцена вылын сьыліс нималана (мый?) 3) Пачысь чугун перйёны (мыйён?) 4) Челядь велөдчисны ворсны (мыйён?)

Отсөг кывъяс: **хор, хоккей, холодильник, укват.**

• 1. Содты сёрникузясө лөсялана х да к шыпаса кывъяс.

2. Гиж схемалы лөсялысь сёрникузя.

Кытысь? **мый?** **мый вөчёны?** **мыйён?** .

3. Прөверит уджтө.



169 удж. Лыдды гижөдсө.

Челядь лыддисны петук йылысь мойд тайё мойд сертиыс дасьтисны серпаса небөг художник-нас вөлі Хабаров Петя небөггыс артмис синмө шыбитчана петук йылысь небөгсө босьтисны выставка вылө.

• 1. Юклы сёрникузяс вылө да гиж.

2. Медводдза сёрникузяысь визьнит подувпас да юөрпас.



Синмө шыбитчана.



Ч да Ц шыпас кывъяс



кольча кузнеч



циркуль

БОСЪТ ТӖД ВЫЛАД!

Ц шыпас паныдасьлӧ сӧмын рочысь пырӧм кывъясын. Уна коми кывйын сійӧс вежӧ ч шыпас: рочӧн кольцӧ, комиӧн кольча. Орччӧд: у́лица-улича, мѣльница-мельнича.



170 удж. Тӧдмав юржуглансӧ.

	1			н	ч	а
2				н	ч	а
3				н	ч	а

1. Тӧдмав кывъяссӧ да гиж:

- 1) Паськыд дорыша йӧв видзан джуджыд сӧй доз.
- 2) Пӧжӧм да косьтӧм морков либӧ сӧркни.
- 3) Ӗгыр вылын пӧжалӧм картофель либӧ сӧркни.

2. Кывъясысь визьнит ч шыпас.
3. Прөверит уджтö.

171 удж. Лыдды кывъяслысь вежöртассö.

1. Турун да быдмөгъяс вуж дінтіыс вундöм вылö вöчöмтор, дженъид пу воропа, посни көрт пиньяса. 2. Вотöс да тшак вотöм вылö сямöдысь вöчöм көрöб кодъ доз. 3. Ярьюгыд гöрд рöма бу-мазея дöра.

- 1. Дзугöм шыпасъясысь артмöд кывъяс:

ларач

мануч

чамук

2. Артмöм кывъяссö орччöд кыв вежöртасъяс-ыскöд.

3. Гиж кывъяссö да визьнит ч шыпассö.

172 удж. Лыдды кывъяссö.

Сцена, концерт, переч, теплица, öгуреч, улича, цирк, ситеч, цемент.

- 1. Лöсьöдчы гижны кывзöмön да кык чукөрö юклöмön.

2. Рочысь воём кывъясön лöсьöд öти сёрникузя.



173 удж. Лыдды юалöмъяссö.

1) Мый дасьтісны Аньяслön гажлун кежлö челядь?

2) Мый вурис мамыс концерт кежлө Цывунина Светалы?

3) Көни сьыліс Света?

4) Кызди ошкис велөдысьыс том артистөс?

- 1. Вочавидз юалөмъяс вылө.

2. Сёрникузяяс дасьтігөн пырт татшөм кывъяс: **концерт, ситеч сарапан, шуис молодечөн, сцена вылын.**

3. Прөверит уджтө.



174 удж. Лыдды сёрникузяяссө.

Гожөмбыд ме киськалі найөс. Миян керка до-
рын эм теплица. Арнас идралім бур урожай. Ту-
лыснас мамө көдзис сэтчө өгуреч, переч да помидор.

- 1. Сетөм сёрникузяясысь артмөд висът.

2. Юрнимав текстсө да гиж.

3. Визьнит ч да ц шыпаса кывъяссө.

175 удж. Лыдды сёрникузяяссө.

1) Школа теплицаын быдмис уна ... да
2) Сцена вылын ... чөжыс йөзсө гажөдіс клоун.
3) Бөрйысян лун кежлө ... вылын өшлісны ... дө-
рапасъяс.

- 1. Чутъяс местаө содты ч либө ц шыпаса кывъ-
яс да лөсьөд сёрникузяяс.

2. Сёрникузяяс дасьтігөн пырт татшөм кывъяс: **переч, ситеч, улича, өгуреч, кумач, концерт.**



Щ шыпаса кывъяс



176 удж. Колана ногөн лыдды кывъяссö.

Щ – [шш] пицаль	Щ – тш [ч] щöтка	Щ – [ш] плащ
--------------------	---------------------	-----------------



177 удж. Тöдмав юржуглансö.

1	щ			
2		щ		
3			щ	
4				щ

Тöдмав кывъяссö да по-
мав сёрникузяяссö:

- 1) Важмöм керйын артмöма
векни 2) Ваня понпиыслы
вöчис шоныд 3) Эрд вылын сулалис ... пу.
4) Зэра лунö эн вунöд пасьтавны

178 удж. Лыдды кывъяссö.

сибдöма
уджалö
видзö
корö
мунö

ящикын
прöща
щöгöля
щельö
клевщиöн

- 1. Артмод кывтэчасъяс.
- 2. Лосьодчы гижны кывтэчасъяссö кывзö-мөн.
- 3. Кывтэчасъясөн лосьод кык сёрникузя.
- 4. Прөверит уджтö.

179 удж. Гиж сёрникузясö чутъяс местаас лöсялана кывъяс содталöмөн.

1. Ичöt ур со, ... кодъ уска,
Вайö телега тыр сус коль.

2. Лудік пырис пыді

В. Лыткин

Отсöг кывъяс: щötъ, щельö.



180 удж. Лыдды гижöдсö.

Сыктивкарын эм Вежа Стефан площадь **тані** Победа лунö овлö парад праздникъяс дырйи шөр **площадь** вылö чукöртчöны коми йöз

- 1. Юклы гижöдсö сёрникузяс вылö да гиж.
- 2. Тöдчöдöм кывъясылысь висътав гижан-ногсö.
- 3. Тöдмав юркарсa площадь йылысь да содты некымын сёрникузя.



Площадь, изэрд.

Стефановскöй площадь, Вежа Стефан изэрд.

КЫВСИКАСЪЯС



Предмет, действие да признак нимъяс



181 удж. Вайöd предмет, признак да действие петкөдлысь кывъяс «Тулысын» тема серти. Лөсьöd некымын сёрникузя.



182 удж. Лыдды кывъяссö.

Шылыд, югөр, усис, юкмös, тёпкö, вильыд, пуксис, кильчö, шонид, сыліс, лэбув, дэбыд.

- 1. Бөрйы предмет, действие да признак нимъяс.

2. Гиж кывъяссö куим чукөрö.

эмакыв	кывберд	кадакыв
югөр	шыльыд	усис
...

183 удж. Лыдды текстсö.

Тулыслөн медводдза шыяс.

Войвылö ... гажа тулыс. Ывлаыс Лым-йыс ... , Енэжыс Водз ... мелі шонді. Гөгөр ... варов шоръяс. Сынöдыс

- 1. Содты лöсялана кывъяс: **сьödöдіс, воис, садьмö, визувтöны, сöстöммис, ыркыд, ляпкаліс, югдіс.**
 2. Гиж текстсö.
 3. Прöверит уджтö.

184 удж. Лыдды Михаил Лебедевлысь кыв-бурсö.

Заводит...с шонд...
Тöвлысь вежны лад,
Яра сотны понд...с,
Во...с тувсов кад.

ярьюгыд
шонді

- 1. Кызди тэ гөгөрвоан «Тöвлысь вежны лад» сёрникузя?
 2. Бөрйы признак петкөдлысь кывъяс **шонді** кыв дорö.

3. Вайөд лад кыв дорö лөсялана матын вежөр-таса кыв.

4. Гиж кывбурсö колана шыпасъяс содталөмөн.

185 удж. Лыдды коми приметаяс да гөгөрвоод найöс.

Ракаяс кө кравзöны – шондöдас.

Кузь йинёнъяс кө öшйисны керка вевт доры-шö – тулыс нюжалас.



Эмакыв

186 удж. Лыдды кывъяссö.

картупель, сапöг – п □□□□ а

кöин, зарава – к □□ а

тулыс, вадор – л □□□ а

• 1. Кывъясын торйöдöмөн слогъясысь артмөд выль кывъяс.

2. Артмөдöм кывъяслы сет юалöмъяс да гиж: *мый?* Пельса, ...

3. Прöверит уджтö.

187 удж. Лыдды кывъяссö.

Жонь, визув, анькытш, пукалö, мырпом, пыста, сёркни, көч, нель, катша, капуста, морков, чикыш.

• 1. Гиж медводз *мый?*, сэсса *кодi?* юалом выло вочавидзысь кивъяс.

2. Содты быд чукөрö кык кывйөн.

3. Аддзы лөсявтөм кивъяс.

4. Прөверит уджтö.

188 удж. Лыдды кивъяссö.

Ён, шнөп, бушков, дыр, нель, гыч, слөт, öдйö, йи, мунö, шыр.

• 1. Бөрйы да гиж *мый?* юалом выло вочавидзысь кивъяс да прөверит.

2. Гижом кивъясылысь гөгөрвоод вежөртассö.

3. Вайөд ывлавыв петкөдчөмъяс вежөртаса *мый?* юалом выло вочавидзысь кык кыв да гиж.

189 удж. Лыдды юалөмъяссö.

1) Кодi пусьö? 2) Кодi вайö йөв? 3) Кодi чеччалö пусь пуö? 4) Кодi дзизгö?

• 1. Вочавидз юалөмъяс вылас да гиж 4 кыв.

2. Содты *кодi?* юалом выло вочавидзысь кык кыв.

3. Прөверит уджтö.

190 удж. Лыдды кивъяссö.



Войт, пурт, көш, керка, юкмөс.

• 1. Кутшөм кывъяс «дзэбсьомаось» сетөм кывъясас?

2. Кывъяслы сет юалөмъяс да гиж «дзэбсьөм» кывъяссө: *мый?* **Вой**, ...

3. Прөверит уджтө.

191 удж. Лыдды кывъяссө да төдмав вежөртассө.

Гөп – ..., вой – ..., збыльтор – ..., асыв – ..., выв –

• 1. Быд кыв дорө вайөд паныд вежөртаса кывъяс.

2. «Паныд вежөртаса кывъяс» кывкуд серти прөверит уджтө.

192 удж. Ваня вайөдіс да гижалис кык столбикө кывъяс. Со мый сылөн артмис.

мый?	коді?
Эжва	гижысь
Серук	Изьва
юкмөс	петук

• 1. Эм-ө Ванялөн уджас тырмытөмторъяс?
2. Висьтав, мыйла зонкалөн лоины торксьөмъяс.

3. Вєськөд торксьөмъяссө.

193 удж. Лыдды кывъяссö.

Конюк, съдбöж, лежнöг, бобув, пастук, ош, кыйсьысь, кельчи, берба, вöралысь, вурдысь, пипу, чирк, анча, енгаг, ниа, мазі.

- 1. Гиж кывъяссö чукөръяс вылö торйöдöмөн.

Йöз: конюк, ...

Пемöс: съдбöж, ...

Гут-гаг: бобув, ...

Быдмöг: лежнöг, ...

2. Быд чукөрö содты öти кыв.
3. Кутшöм кыв эз веськав некутшöм чукөрö?
4. Прöверит уджтö.



Эмакывлөн лыд Ь да Ъ – торйöдан пасьяс



194 удж. Лыдды нöдкывъяссö да тöдмав.

1) Тöлын и гожöмын öти паськöма. 2) Нель вок öти вет улын олöны. 3) Öти мамлөн вит пи да ставныс öти нимаöсь. 4) Лудысь аддза тан и сэтысь, ветлöдлöны пась да кепысь. 5) Ён, но оз вöч уджтö. Оз вись, а век ружтö.

- 1. Тöдмалöм кывъяссö гиж уна лыдын.
- 2. Прöверит уджтö.

195 удж. Лыдды Эльвира Поляковалысь гижодсö.

Пожöмлön паспорт

Батя-пия кайисны вöрö пес пилитны. Воис керас. Тані быдмисны козьяс, кызъяс да пожöмъяс.

Батьыс пилаөн орöдис пожöм пулысь дінсö да чышкыштіс пилитöминсö. Ваня вундасъыс казяліс **кытшъяс**. Батьыс висьталіс пожöмлön вогögöрся пасъяс йылысь. Зонка тэрыба лыддис кытш лыдсö да тöдмаліс пуыслысь арлыдсö.



Ваня гögöрвоис, мый пуяслön эм аслысьяма паспорт – быдман пас.

- 1. Мыйла висьтыслы сетöма татшöм юрним?
- 2. Гögöрвоöd торйöдöм кывъясыслысь гижанногсö.
- 3. Бөрйöмön гиж кывъяссö, көні эм торйöдан ь да ь пасъяс.
- 4. Висьтав, мыйла **пуяслön** кывйын оз гижсьы ь да ь пас.



Керас – вөр пöрöдöмин.

196 удж. Лыдды кывъяссö.

Лун, вой, пу, кöч, куст, бадь, яг.

- 1. Гиж кывъяссö уна лыдын анбур серти.
- 2. Гөгөрвоод торйöдан ь да ь пасъяс гижанногсö.
- 3. Кутшöм кывъясын -яс водзын оз ков гижны ь да ь пасъяс? Мыйла?
- 4. Прöверит уджтö.
- 5. Лöсьöд кык сёрникузя.

197 удж. Лыдды кывъяссö да дасътысь гижны диктант. Инды орфограммаяссö.

Льöм, колипкайяс, кольта, зiяс, пышкайяс, жоньяс, дзоридзьяс, муяс.

198 удж. Лыдды текстсö.

Водз асылын

Кутшöм лöсьыд водз асылын мунны вöртi! Сынöдыс ыркыд. Тыр морöсөн лoлавсö. Кок улад шаракылöны кос коръяс. Бура тыдалöны кузь вуджөръяс. Кылö лэбачьяслөн мича сьылöм. Көнкö тотшкöдчöны сизьяс. Пуяс костысь тыдовтчисны шондi югөръяс. Найö югдöдiсны пу увъяссö да вожъяссö.

- 1. Аддзы текстысь сайкыд, кышакывны кывъяслы матын вежöртаса кывъяс.

2. Лыдды кывъяс: **шаракылöны, кышакылöны, кыша-кашакылöны, шура-шаракылöны.** Мый öткодъыс тайö кывъясылöн?

3. Текстись аддзы уна лыда эмакывъяссö.

4. Уськöд тöд вылад да висътав, кызди колö вуджöдны визъысь визьö торйöдан **ь** да **ъ** паса кывъяссö.

5. Гиж уна лыда эмакывъяссö öти визъысь мöд визьö вуджöдöм могысь юклöмөн.

6. Прöверит уджтö.



199 удж. Лыдды кывъяссö.

Яг...ясын, йыв...ясыс, сис...яс, пожöм...яс, туган...яс.

• 1. Мый йылысь позьö висътавны кывъяссö пыртöмөн?

2. Гиж кывъяссö, содты **ъ** да **ь**.

3. Лöсьöд «Гажа ягын» текст-серпас.

200 удж. Лыдды. Пырт сёрникузяясас 199-öд уджысь кывъяссö.

(*Кöни?*) ... быдмис сöмын пожöм. Гөгөр сулалисны ... кодъ том Öткодъ кызта пуяслөн пашкыр ... жмитчисны öта-мöдныс динö. Кос ягыс кажитчис ыджыд вевт ув кодьөн. Ягыс вöли югыд, ылöдз тыдалис. Сук ... пыр писькöдчис асья шонди югөр.

И. Торопов

- 1. Кызди тайо текст-серпасо поэо юрнимавны?
- 2. Кутшом серпас сувтис син водзад?
- 3. Вайод матын вежортаса кывъяс пашкыр, сук кывъяслы.



Морт нимъясын, овъясын да вичъясын ыджыд шыпас

201 удж. Лыдды.

Геннадий Анатольевич Юшков – нималана коми гижысь. Сылон гижодъясыс велодоны радейтны ас чужан му. Челядь йылысь висътъясын гижысь петкодло ныв-зонлысь бур сямсö. Аслас кывбуръясын сийö восьтö миян чужан мулысь мичлунсö, мортлысь вынсö да сөстөмлунсö.

- 1. Мый төдан Г. А. Юшков йылысь?
- 2. Кутшом висътъяс, кывбуръяс да мойдъяс сылысь лыддин?
- 3. Вайод сям кывлы матын вежортаса кыв.
- 4. Гиж медводдза сёрникузясö. Визьнит ним, вич да овсö.

202 удж. Гиж ассыд ов, ним да вичтö.

Менам овой
 Менам нимöй
 Менам вичöй

ов – Юшков
 ним – Геннадий
 вич – Анатольевич

203 удж. Гиж тыр нимъяс.

Коля – Николай	Люда – ...	Женя – ...
Оля – ...	Саша – ...	Витя – ...

204 удж. Гиж текстсö.

Канев Ванялысь батысö шуöны Николай Ивановичöн. Ваняöс шуöны уна ногөн. Мамыс шуö Ванюкөн, пöлыс – Ивöөн, пöчыс – Ивукөн. А батыс ыдждöдлö

- 1. Помав медбөръя сёрникузясö.
- 2. Канев Ваня йылысь лыдды Э. И. Полякова-лөн «Чужан му» небöгысь.

205 удж. Лыдды текстсö.

Öльöксанлөн эм ичöt вок Миша. Сылөн талун нимлун. Батыс воис гортас неыджыд тубрасөн.

– Чолöмала тэнö, **Микайлö**, нимлунөн. Ме тэ-ныд, пиук, **микайлöös** козьнала, – шмонитыштö-мөн шуис бать да мыччис пиыслы чача-ош.

– Аттьö, батьöй! – радліс зонка да мөдіс бергöд-лыны-гартны чачасö ключөн. **Микайлö** варгылясис джоджын.

- 1. Орччöд тöдчöдöм кывъяссö да мөвпышт, кутшöм юалöм вылö вочавидзöны найö.

2. Мый позьö шуны микайлö да Микайлö кывъяс йылысь? Кор тайö кывйыс гижсьö ыджыд шыпасянь, а кор ичöтсянь?

3. Мыйла шуöма «Микайлö варгылясис»? Вайöд варгылясис кыв дорö матын вежöртаса кывъяс.



206 удж. Лыдды висътсö.

Олялөн шондi

Олялы пöдругаыс сетiс дас семечки тусь. Рыт-нас нывка семечкисö кöдзис да градсö киськаліс шоньд ваөн.

Пуксис гожöм. Оля весалис ёгсö да киськаліс быдтассö. Семечки öдйö быдмис. Регыд петiсны шочиник паськыд коръяс.

Öти асылö Оля петiс град йöрас да чуймис. Кыз кокъяс вылын öшалiсны тасьтi кодь гöгрöс кытшъяс. Весиг сиктса йöз нимкодясисны быдмöгөн. Нывкалысь быдтассö Антип дядь шуис шондiөн. Олялы любö.

И. Коданёв серти

- 1. Мыйла Антип дядь быдтассö шуис шондiөн?
- 2. Мый позьö шуны Оля йылысь?
- 3. Мый медтöдчанаыс висътас?
- 4. Мыйла висътыс шусьö «Олялөн шондi»? Кутшöм «шондi» йылысь муно сёрниыс?
- 5. Босът юрвежад тöдчöдöм кывъяслысь гижанногсö.
- 6. Вайöд шоч, шочиник кывъяс дорö лöсялана матын вежöртаса кывъяс.

7. Лөсьöd текст серти план.
8. План серти гиж изложение да прöверит.



Йöзкостса ним-вичьяс

207 удж. Лыдды.

Уна коми мойд гижис Пылаева Соломония Васильевна. Тайö коми аньыс ассьыс небöгъяссö кырымалö Сöлö баб нимөн.

- 1. Инды ов, ним, вич да прöзвищöсö гижысьыслысь.
- 2. Кутшöм мойд тэ лыддин Сöлö баблысь?
- 3. Тöдмав мукöд коми гижысьяслысь прöзвищöсö.

208 удж. Лыдды йöзлысь ним да вичсö, орччöд найöс коми ногөн ним-вичкöд.

Семён Кузьмич
Мария Петровна
Евдокия Фёдоровна
Александр Макарович
Парасковья Николаевна
Михаил Афанасьевич
Александра Павловна
Василий Трофимович

Петыр Машö
Опонь Мишö
Трöш Вась
Кузьма Семö
Педөр Öдя
Павел Сандра
Микулай Парась
Макар Öльöксан

209 удж. Лыдды да висьтав, мыйла кывъясылөн гижанногыс торъялө.

йөрш
ичöt
ён

Йөрш Öсип
Ичöt Öдя
Ён Пронь

210 удж. Лыдды Настялысь висьталөмсö.

Миян сиктса олысьяс
(Настялөн висьт)

Миян сиктын олöны бур сьölöма да уджач йöз. Сиктсаяс öта-мöдсö ыдждöдлöны коми ногөн. Öтияслы нимпассö сетöмаöсь удж сертиыс, мöдъяслы – олөм сям вöснаыс.

Менам мамöй вузасьö. Сиктсаяс шуöны сийöс Лавка Таняөн. Батьöй лöсьöдис бур фермерскöй овмöс. Та вöсна сылы Фермер Илля ним вичмис. Менö сиктын шуöны Илля Настукөн. Ме таысь ог дöзмы.

Нöшта висьтышта мукöд йöз йылысь. Нянь Öльöксан томдырйиыс пöжасьлöма пекарняын да новлöдлöма пöжалөм няньсö лавкаö. Прачка Зоя уджавлöма детсадйын да кöлуй пеславлöма. Кöш Мишö кöша трактор вылын уна во уджавлöма. Пельшөр Катя – зэв шань морт, сиктса йöзöс висьöмысь бурдöдö. Стөрöж Володя уна во видзлöма совхозлысь эмбурсö. Ур Вась кыйсьö да пемöс ку примитö. Кöрт Митрей кöрт кузова машина

вылын уджалö, көрт чукөртö да сдایتö. А Варов
Öдä зэв радейтö быдөнкөд сёрнитны-варовитны.

Йöзкостса нимнас ыдждöдлiгөн быдөнöс позьö
бура тöдмавны. Ов ни вич оз ков!

- 1. Инды висьтсьыс йöзкостса нимъяс.
- 2. Висьтав, мыйла сиктса йöзсö тадзи шуöма-
öсь.
- 3. Мый позьö шуны Настя йылысь?
- 4. Тöдан-ö тэ чужан сиктса йöз йылысь?
- 5. Тöдмав аслад сиктса йöзлысь прöзвищöяссö.

211 удж. Лыдды коми прöзвищöяс. Висьтав,
мыйла тадзи шуöмаöсь йöзсö.

Кузь Иван, Дзоля Вась, Ош Толя, Бригадир
Машö, Кино Микулай, Артист Толя, Шахтёр Во-
лодя, Курöг Лена.



Пемöс нимъясын ыджыд шыпас

212 удж. Лыдды Альберт Ванеевлысь кыв-
бурсö. Велöд да гиж юрсьыд.

Сюрук

Мöсным еджыд сюра,
Нимыс сылөн Сюрук.
Дöзьöрита бура,
Сета ва да турун.



213 удж. Видзёд серпасъяс.



- 1. Лёсьöd серпасъяс серти куим сёрникузя да гиж.
- 2. Сёрникузясö пырт пемöс нимъяс.

214 удж. Лыдды каньпи да пон нимъяс содталёмөн.

Вильыш каньпи

Муруклөн быдмис ... нима каньпи. Сійö вöли зэв вильыш. ... уськөдчис чипанпян бөрся. Найö пышйисны пон чом динö. Чомсьыс петис ... да эрöстис каньпи вылö. ... повзис гораа увтыштёмсьыд да кайис потшöс вылö. Чипанпян котöртисны гидö.

215 удж. Лыдды сёрнисö. Содты лöсялана пемöс нимъяс.

НАСТЯ: – Меным пöчöй козьналіс ичöтик кань-пиöс. Сійö зэв пушыд гöна, плешкас некымын еджыд чут. Ме сылы сеті ... ним.

ТАНЯ: – А мянлысь гортнымöс видзö зэв сюсь, еджыд плеша ... пон.

ЗОЯ: – Миян мöсным куканясис. Вайис смоль сьод кукань. Шуим сійöс

216 удж. Лыдды.

1. Менам Серко ыджыд пон,
Гашкö, кöинысь на ён.

Г. Юшков

2. Менам муса Рыжко вöv –
Зарни рöма чибö.

В. Лодыгин

3. Полюк Машка помся кашкö,
Йöрын кылö: рук, рук, рук!

В. Бабин

4. Васька кань еджыдик,
Бöжыс сылөн рудіник,
Котралö кыз ньöv.

В. Лыткин

- 1. Инды пемöс нимъяссö да гиж: **Серко пон, ...**
- 2. Кызди гижысьыс серпасалöма быд пемöсöс?
- 3. Аддзы кывбуръясысь **чань, порсьпи** кывъяслы матын вежöртаса кывъяс.

217 удж. Лыдды кывбурсö.

Луд вылö петкöдам
Найöс ми сэк,
Пöттöдзыс ветлöны,
Йирсьöны мед

Визюк, Купальнича,
Пöлудь да Öмидз,
Калюш да Умнича,
Сьöдпель да Рöмидз.

В. Ширяев

- 1. Аддзы кукань нимъяссö.
- 2. Висьтав, мыйла куканьяссö тадзи нимтö-маöсь.



218 удж. Лыдды.

Буско пон

Буско эз торъяв
сиктса мукöд понъяс-
ысь аслас мичлуннас.
Гöныс ..., сöмын морöс-
ыс да бöж йылыс
Ачыс ..., ... синма, ... кока,
... пеля. Бöжыс кöлачөн
гартовтчöма.

- 1. Лыдды кывъяс:
**неыджыд, сьöд, тöлка,
сувтса, еджыд, кузь.**

2. Видзöд серпассö да содты текстö колана кывъяс.

3. Дасьты текст-серпас каньпи йылысь.





Кар, сикт, грезд, ю нимъясын Ыджыд шыпас

219 удж. Орччөд роч да коми сикт нимъяс.

Койгорт	Палевицы
Паль	Усть-Вымь
Абъячой	Койгородок
Шойнаты	Усть-Цильма
Немдін	Сторожевск
Емдін	Усть-Нем
Чилимдін	Объячево

220 удж. Лыдды сикт нимъяссө.

Емдін, Чилимдін, Кулөмдін, Абъячой, Көрткерөс, Изьва, Визин, Ыджыдвидз.

- Гиж анбур серти коми сикт нимъяссө.

221 удж. Лыдды текстсө.

Помөсдін сикт сулалө Эжвалөн помөсвожса джуджыд керөсын. Сиктса школаын витөд класса велөдчысь Толя Уляшовлы сюрөма из-метеорит.

Өні енэжизсө видзöны музейын. Коми сиктса зонкалөн нимыс пырис наукалөн историяö. Тадзи Анатолий Петрович Уляшов отсаліс төдмавны космослысь аслыспөлөслунсө.

Л. Кузнецова серти

- 1. Лыдды ыджыд шыпассянь гижсьысь кывъяс.
- 2. Мыйла кывъяссö гижöма ыджыд шыпассянь?
- 3. Гиж сикт да ю нимъяссö.

222 удж. Лыдды кывъяссö.

Инта, Айкатыла, Нёбью, Кörtкерöс, Микунь, Нёбдін, Усинск.

- 1. Корсь мусерпасысь кар да сикт нимъяссö.
- 2. Гиж кывъяссö кык чукөрö.
- 3. Кутшöм кыв оз лöсяв да мыйла?
- 4. Прöверит уджтö.

223 удж. Лыдды Анналысь висьталöмсö.

Ме ола Ыджыдвидз сиктын. Миян керкасянь зэв матын Висер ю. Сикт шöрас сулалö кык судта ыджыд школа. Каникул дырйи ми ветлім Сыктивкарö.

- 1. Инды кар, сикт да ю нимъяс.
- 2. Гиж ыджыд шыпассянь гижсьысь кывъяссö.
- 3. Содты кар, сикт да ю ним.



224 удж. Лыдды юалöмъяссö.

- 1) Кутшöм сиктын либö грездын тэ олан?

- 2) Кызди шусьö шөр сиктыд?
- 3) Кутшөм ю бокын сулалө чужан сиктыд?

- 1. Вочавидз юалөмъяс вылас.
- 2. Гиж аслад сикт йылысь.



225 удж. Лыдды сетөм кывъяссö содталө-мөн.

... ю бокын сулалө ... грезд. ... да ... мунисны вотчыны. На бөрся котөртис ... пон.

Отсөг кывъяс: **Петя, Эжва, Ваткыль, Визябөж, Илля.**

- 1. Помав висьтсö да юрнимав.
- 2. Гиж текстсö да прөверит.

226 удж. Гиж сёрникузяяссö колана шыпасъяс содмалөмөн

1. Зэрөм бөрын ывлаыс зэв (М,м) ича. Кука-ныслы сетисны (М,м) ича ним. 2. Батя-пия мөдөд-чисны (Г,г) өгрөс ты дөрө. Йөз пукалисны (Г,г) өгрөс пызан сайын да сьөлөмсянныс варовитисны. 3. Миян (Т,т)упыльным вөлі зэв вильшасьысь. Сийө радейтис ворсны (Т,т)упыльөн да дзугны сийөс. 4. Потшөс вылө шыөн шувкнитчис-пуксис (В,в)арыш да повзьөдіс курөгъясөс. Вотчысьяслы важысянь нин төдса (В,в)арыш грезд.

227 удж. Лыдды кывбурсö.

Ваын сулалöны пуяс.
Ваыс рөмпöштан кодь лöнь.
Эжва, Сыктыв – коми юяс,
Быттьö паськыд эзысь вöнь.

М. Лебедев

- 1. Гөгөрвоод төдчөдөм кывъяслысь гижанног-сö.
- 2. Гиж кывбурсö юрсьыд.

228 удж. Лөсьöдчы гижны диктант.

Эжва

Дзоляник шорсянь заводитö Эжва кузь туйсö. Вочасөн сійö паськалö да ёнмö. Гажаа сёльгö юыс да кылöдö васö. Джуджыд кыркötш дорсянь бура казялан мича серпас. Ылөдз тыдалö паськыд ота ю. Лыаыс еджыд да шоныд. Ю пöлöныс лэбалö тэрыб чикыш.



Кыркötш – джуджыд крут берег.

От – юлөн пасьтаыс.



229 удж. Лыдды текстсö.

Мудер катшаяс

Митрей дядьлөн вöлі Шарик нима вöралан пон. Оліс сійö ывлаын да видзис гортсö. Кöзяин бура дözьöритіс понсö.

Öтчыд көзьяин петкөдиc Шариклы сёян. Лэб-
зисны кык катша. Öти катшаыс пуксис понлы
воча да китшкис. Дöзмöм понйыд уськөдчис
катшалань. Шарик көсйис кутны наян лэбачтö.
Тайö здукö ...

С. Раевский серти

- 1. Вайöd **воча, наян** кывъяслы матын вежөр-
таса кывъяс.
- 2. План серти висътав лоöмтор йылысь.
 - 1) Шарик – бур вöралан пон.
 - 2) Кык катшалөн мудеритöм.
 - 3) Катшаяслөн пируйтöм.
- 3. Дзугöм кывъясысь лöсьöd сёрникузя: **чöс-
кыд, кватитис, мöд катшаыс, кусök.**
- 4. Помав висътсö.
- 5. Босът тöд вылö кывъяслысь гижанногсö:
ötчыд, уськөдчис, окотапырысь, пируйтисны.
- 6. Лыдды висътсö мöдысь.
- 7. Гиж изложение да прöверит уджтö.



Кадакыв



230 удж. Комиöd роч текстсö.

Вот и пришла весна. После зимнего сна про-
сыпается лес. На деревьях появились зелёные ли-
сточки. Звонко поют птицы. На полянке расцвела
мать-и-мачеха.



231 удж. Лыдды.

воис, миян, тулыс, войвылө
ловзьөдіс, ывла, мелі, сійө, лов шынас
вевт вылысь, тёпкө, войтва, му вылө, керка
өшійө, войнас, да, йинёнъ, көдздөдө
пышкой, воөмлы, радлө, тулыс
сьылө, пыста, гажаа

- 1. Лөсьөд кывъясысь сёрникузяяс.
- 2. Сёрникузясысь дасьты текст да юрнимав.
- 3. Прөверит уджтө.

232 удж. Вайөд кадакывъяс.

Йи пластъяс (*мый керөны?*): пышійоны, кыла-
лөны, ...,
Тувсов ва (*мый керө?*): писькөдчө, паськөдчө,
... ,

233 удж. Вежлав сёрникузяяссө петкөдлөм
серти.

Бузгис шор. –
Воис сырчик. –
Воссис ю. –

Сьылө лэбач. –
Сьылөны лэбачьяс.

234 удж. Содты отсөг кывъяс да артмөд вөр
йылысь нөдкыв.

Тулысын ..., гожөмын ..., арын ..., төлын

Отсөг кывъяс: гажөдө, вердө, шонтө, ыркөдө.

- 1. Прөверит уджтө.
- 2. Ачыл лөсьөд вөр йылысь нөдкыв.
- 3. Бөрйы волысь өти кад да лөсьөд вөр йылысь текст-серпас.

235 удж. Лыдды кык чойлысь сёрнисө.

Кык чой ворсісны школаысь. Анна – велөдысь. Сійө ичөт чойыслы сетіс удж:

– Машук, кывзы татшөм сёрникузя: **Ордйысьөм бөрын зонка шойччис.** Тайө сёрникузясьыс корсь действие петкөдлысь кыв.

Ичөт чойыс недыр мөвпыштөм бөрын вочавидзис:

– Тани абу **мый керис?** вылө вочавидзысь кывыс. Зонкаыс өд нинөм эз вөч, сөмын шойччис.

- 1. Висьтав, мыйла Машук эз вермы индыны действие петкөдлысь кывсө.
- 2. Торйөдөм сёрникузясьыс инды кадакывсө.
- 3. Мыйла **шойччис** кыв лоө кадакывйөн?

236 удж. Лыдды кывъяссө.

Сөян, сөйис, сөянтор; сола, солаліс, сов; радейтөм, радейтысь, радейтіс.

- 1. Бөрйы да гиж сөмын кадакывъяссө.
- 2. Мыйла кадакывъясын гижсьоны і да и шы-
пасъяс?
- 3. Öти кадакывйөн лөсьöd сёрникузя.

237 удж. Лыдды кадакывъяссө.

Дзольгыны, мунны, сёльгыны, восьлавны, корсьны, жургыны, тапиктыны, боргыны, шалс-
йыны.

- 1. Мый петкөдлөны кадакывъясыс?
- 2. Кадакывъяссө юклы кык чукөрө.
- 3. Кутшөм кыв эз пыр некоднан чукөрас?
Мыйла?
- 4. Прөверит уджтө.

238 удж. Лыдды эмакывъяссө.

Сюзь Катша Рака Гут Ном
Чирк Утка

Отсөг кывъяс: тінгө, кравзө, буксө,
герчкө, чирксө, дзизгө, китшкө.

- 1. Висьтав, мыйөн өткодьюсь кывъясыс. Ку-
тшөм юалөм вылө вочавидзөны найө?
- 2. Эмакывъяс дорө бөрйы
лөсялана кадакывъяс да гиж.
- 3. Прөверит уджтө.

Сюзь буксө.



Кывберд

239 удж. Серпас серти вайöd признак петкөд-
лысь кывъяс да гиж.



240 удж. Лыдды кывъяссö.

Веж, ворсö, лöz, ывла, сулалö, кольквиж, енэж,
öдйö, яръюгыд.

- 1. Бөрйы да лыдды сöмын кывбердъяссö.
- 2. Висьтав, мыйöн öткодьöсь найö.
- 3. Серпас серти лöсьöd некымын сёрникузя,
пырт рöm петкөдлысь кывбердъяс.

241 удж. Лыдды. Висьтав, кутшöм признак
ним лöсявтöм быд визьын.

- 1) Гөрд, еджыд, шоныд, виж.
- 2) Юмов, сола, паськыд, курыд.
- 3) Сюсь, чöскыд, мудер, авъя.



242 удж. Лыдды кывбердъяссө.

- 1) Гөрд, кузьмөс, юмов, чөскыд.
- 2) Веж, джуджыд, ёсь йыла, колля, лапъя, дзор тошка.
- 3) Сюсь, съод синма, ичөтик, визя мышка.
- 4) Полысь, руд, кузь пеля, дженьыд бөжа, төв-нас еджыд, гожөмнас руд.

- 1. Кывбердъяс серти төдмав предметсө.
- 2. Прөверит уджтө.



243 удж. Лыдды нөдкывсө да төдмав.



Вөр-ва весьтө өшөдчывлө
Уна рөма югыд мегыр.
Сөмын, кор тай пемдас ывла,
Мича мегыр вошө регыд.

А. Ванеев

- 1. Кутшөм кывбердъяс отсалісны төдмавны нөд-кывсө?
- 2. Мыйла өшкамөшкасө гижысьыс орччөдөма югыд да мича мегыркөд?



Мегыр – гөгрөса кусыньтөм вөв доддялан пу көлуй, кодөн пысалөны вожсө сийөс дінас.



244 удж. Лыдды роч да коми кывъяссö, орччöд рöмыскöд.



красный

гöрд



оранжевый

вижовгöрд, биавиж



жёлтый

кольквиж



зелёный

турунвиж



голубой

кельыдлöз



синий

лöз



фиолетовый

лöзовгöрд



245 удж. Содты колана кывбердъяс да лыдды текстсö.

Енэж пасьталаыс уна рöмөн ворсöдчö ... öшка-мöшка. Сийö сигöртöма ... енэжсö и ... юсö. Öшка-мöшка зэв ясыда пöртмасьö гöрд, ..., ..., ..., ..., ..., ... рöмъясөн. Шемöсмöдана мича серпас!

246 удж. Лыдды эмакывъяссö.

... ёль , ... яг, ... шор, ... кыз.

визув ёль

• 1. Бöрйы эмакывъяслы лöсялысь признак пет-кöдлысь кывъяс.

2. Гиж нель кывтэчас **кывберд** + **эмакыв** схема серти.

247 удж. Лыдды кывъяссö. Вайöд сетöм признак нимъяслы паныд вежöртаса кывъяс.

Еджыд – ..., чорыд – ..., дженьыд – ..., ыджыд – ..., көдзыд – ..., югыд – ..., кизьöр – ..., юмов – ... , том –

Отсöг кывъяс: **ичöт, пемыд, сьöд, пöрысь, шоныд, сук, небыд, курыд, кузь.**

248 удж. Содты 247-öд уджын сетöм признак нимъяс дорас лöсялана предмет нимъяс да гиж.

Вöч тадзи: **Лым еджыд, а шом сьöд.**

249 удж. Лыдды сёрникузяяссö. Быд сёрникузяö содты лöсялана кыв да гиж.

1) Кампет юмов, а турипув 2) Сунисыс вöс-ни, а гезйыс 3) Тöвнас лунъясыс дженьыдöсь, а гожöмнас 4) Туйыс паськыд, а трöпаыс



250 удж. Комиöд сёрникузяяссö да гиж.

Ласковое солнышко пригрело землю. Весело побежали шумные ручейки. Появились чёрные проталины. Скворец поёт свою весеннюю песенку.



251 удж. Содты мамöс донъялан кывъяс.

Авъя, вежöра, мелі, муса, ...

252 удж. Вежлав кывтэчасъяссö.

тэрыб шор –
югыд кодзув –
мича дзоридз –


ТУВСОВ ЛУН –
ТУВСОВ ЛУНЪЯС



253 удж. Тöдмав юржуглансö.

• 1. Вайöд матын вежöртаса кывъяс да тöдмав:

1) Скöвöрöда; 2) чöвлун;
3) эбöс; 4) жеб; 5) котыр;
6) кöр; 7) госа; 8) майöг;
9) гöлик; 10) орнамент.



2. Прöверит уджтö.

254 удж. Лöсьöдчы гижны творчествоа диктант.

Вöрын

Лунтыр котшкö сизь. Кöнкö ылын ливкйöдлö кöк. Льöм пу улысь чепöсйис ... визяорда. Кок улын быдмö ... турун. Небыдик яла вылö петöма ... пожöм. Вöрса шорын дзольгö ... ва. Эрд ылын быдмö ... дзоридз.

Отсöг кывъяс: **веж, пельк, тувсов, том, кöдзыд.**



Кывбөр



255 удж. Лыдды да орчод роч да коми гижодъ-яссö.

над селом	сикт йылысь
у, возле села	сикт весьтын
о селе	сикт сайын
за селом	сикт дорын, бокин

- 1. Инды откодълунсö роч кывйын предлоглысь да коми кывйын кывбөрлысь.
- 2. Висьтав, мыйон найö торъялöны.
- 3. Мыйла кывбöрсö таdzi шуöмаöсь?
- 4. Лöсьод кывбöра кывъясөн сёрникузяяс.

256 удж. Лыдды кывъяссö.

Керка, урок, кильчö, ю.

- 1. Кывъяс дорас бөрйы колана кывбөр: **водзын, бöрын, улын, вылын, весьтын.**
- 2. Дасьты кык сёрникузя да гиж.



257 удж. Лыдды шусьöгсö.

Шондi водзын шонид, мам дiнын лöсьыд.

- 1. Кыдзи тэ гөгөрвоан тайö шусьöгсö?
- 2. Гиж шусьöгсö небöгö видзöдтöг.
- 3. Визьнит кывбөръяссö.

258 удж. Лыдды сёрникузяяссө.

1) Керка ... быдмис пашкыр кыз пу. 2) Ми вуграсим ю 3) Сикт ... өшйис съод кымөр. 4) Потшөс ... пукаліс колипкай да мичаа сьыліс.

• 1. Бөрйы лөсялана кывбөр да гиж сёрникузяяссө.

2. Визьнит предмет нимъяссө кывбөръясыскөд.



259 удж. Комиод да гиж.

Пришёл к другу, спрятался за деревом, написал о лете, стоял у крыльца, повесил на верёвку.

260 удж. Лыдды висьтсө сетом кывбөръяссө эмакывъяс дорас содталомөн.

Ябыръяслы выль оланін

Воис тулыс. Амбар ... ме сувтөді **ябыръяслы** выль керка.

Воисны **лэбачъяс**. Найө чөла **пукалісны** тополь увъяс ... да видзөдісны гөгөр. Поз ... **лэбисны** кык ябыр. **Выль** оланіныс вичмис том паралы. Найө **пукисны** тас ... да тотшөдісны нырнас. Сэсса **лэбисны** поз ... да овмөдчисны сэтчө.

С. Раевский серти

Отсөг кывъяс: **вылө, пытшкас, бокө, дорө, вылын.**

• 1. Гөгөрвоод тодчөдөм кывъясылысь гижан-ногсө.

2. Вайөд **вичмис, чөла** кывъяслы матын вежөртаса кывъяс.

3. Вайөд **выль, том** кывъяслы паныд вежөртаса кывъяс.

4. Гиж эмакывъяссө кывбөръясыскөд.

5. Прөверит уджтө.



Өтвужъя кывъяс

261 удж. Лыдды юалөмъяссө.

- 1) Коді велөдө челядьос?
- 2) Коді пуө чөскыд сёян?
- 3) Коді вурө выль платтьө?

Велөдысь
велөдө
челядьос.

- 1. Вочавидз юалөмъяс вылө.
- 2. Инды өтвужъя кывъяссө.

262 удж. Лыдды кывъяссө.

Туй, туйвеж, ордым, туйвыв.
Гөрысь, гөрөд, гөрны, гөрөм.
Кымөр, кымөра, букыш, кымрасьө.
Вежөр, вежөра, вежөс, вежөртны.
Гы, гыа, гымалөм, гыавны.

туй
туйвеж
туйвыв

• 1. Позяс-ө быд визьө гижөм кывъяссө шуны өтвужъя кывъясөн?

2. Аддзы быд визъысь лөсявтөм кыв. Мөвпышт, мыйла оз лөсяв.

3. Прөверит уджтө.

263 удж. Лыдды.

Сылө, сыланкыв, сылідзир, сылысь, сыланног.

- 1. Инды лөсявтөм кывсө.
- 2. Гиж небыд паса кывъяссө.
- 3. Лөсьөд өти сёрникузя да гиж.

264 удж. Лыдды.

Лидия Логинова – нималана коми сылысь. Сійос радейтөмөн шуоны колип-кайон. Сылысь мыла, небыд гөлөссө некодкөд он сорава. Сыланкывйыс тувсов шор моз дзольгө, ловтө пальөдө. Логинова аслас сьөлөм вөрзьөдана сылөмнас сибалө быдөн дорө. Кывзысьяс сыкөд өтув радлөны и шыалөны, нимкодясьоны и майшасьоны. Тайө аныс мелі гөлөснас, визув синнас, шонді дзирд кодь нюмнас нэм кежлө чужтіс коми войтыр сьөлөмъясын ас дорас ыджыд муслун.



• 1. Кызди гөгөрвоан: «Сьөлөм вөрзбодана сьылөмнас сибалө быдөн дорө» сёрникузя?

2. Мыйла Лидия Логиноваос шуоны колип-кайөн?

3. Аддзы өтвужъя кывъяссө да гиж найос.

4. Текстусь бөрйы шы, кывзыны, рад, муса кывъяс дорө лөсялысь өтвужъя кывъяс.



Лов пальөдны; сьөлөм вөрзбодана сьылөм.



265 удж. Лыдды колана ногөн.

Коми муёй

Кывъясыс Г. Юшковлөн
Сьыланногыс А. Уляшевлөн

Ворсө шонді Эжва юын.

Чужи-быдми Коми муын.

Вирын кыска сылысь мичсө:

Гулыд ягсө, вадор видзсө.

Коми муёй – вежабанёй,

Югыданёй, долыданёй.

Олан гажёй, сьөлөм руёй,

Коми муёй!

• 1. Кызди гөгөрвоан: «Коми муёй – вежабанёй, югыданёй, долыданёй» сёрникузя?

2. Мый позбө висътавны кывбур гижысь йыв-сьыс?

3. Висътав аслад чужан му йылысь.

Прөверит асьтө

30 удж.

Ур

Важ пожомын горс. Тані оло ур. Сійö дасьтис төв кежлас сёян. Ур чукөртис вотос да коль, косьтис тшак. Тайö сёяныс пемөслы төв кежлө. Öнi урыд оз пов төвсьыд!

44 удж. Кор, вөт, гез.

45 удж. Вөв кывйö дзедьсёма «вө» шыпас; көр кывйö – «кө» шыпас.

46 удж. Вурд.

47 удж. Руч.

49 удж. Көин.

50 удж. Анча, вурд, йөра, көр, ош, руч, сьөдбөж, тулан, ур.

53 удж. Сьөдбөж, визяорда, вурдысь.

60 удж. 1) Сөмын гортөм согласной шыяс: пөтка, тош. 2) Сөмын гора согласнойяс: дозмөр, да, гөн, бөж, зыр.

61 удж. Зi, ном, чирк, номыр, черань, вурдысь, юр-сигусь. Лөсавтөм кыв – вурдысь.

74 удж. Гу-лю, джыдж, дзо-дзөг, көк, пинь-кай, ка-ля.

75 удж. Ко-йис, ва-йө-дiс, кый-ны, кый-сьы-сьыд, кый-лө-ма.

76 удж.

Төлын

Воис көдзыд төв. Усис небыд лым. Эрдъяс воль-сасисны еджыд эшкынөн. Ю тупкысис кыз йиөн. Челядь исласьоны лыжиён да даддьөн.

88 удж.

сэтөр	сёркни
зэр	зеп
лэбө	ляпкыд
намыр	нэль
туй	тяпи

90 удж. 1) Воль; 2) гөнью; 3) руч; 4) кынь; 5) каля;
6) жонь; 7) юсь.

92 удж. Сюзь.

96 удж. Ельдөг, эзысь, пель, вонь, пельёс, кольк,
вольпась, толысь, коль, кильчө, висьысь.

105 удж. Лапкор, яла, лампа, нявда; каля.

118 удж. Сёрд, сёркни, ном; сён.

123 удж. Талун Лёнялы тырис көкъямыс арös.
Мамыс пиыслы козьналіс небөг. Батьыс
вөчис небөг джадж. Оля чойыс серпасалис
радейтана каньписö. Пöчыс пöжаліс чös-
кыд пирөг. Пызан вылын мича дзоридзьяс.
Регыд локтасны гösьтьяс.

127 удж. Нэм, лэч, зэр; нэр.

128 удж. Кер, сер, небыд, зеп, тешкодь.

129 удж. Пелысь, кепысь, серпас, лежнөг, челядь,
серöда.

132 удж. Сикт, пими, мазі, низь; сизь.

133 удж. Муніс, восьлаліс, пасьтасис, котöртіс, ри-
зöдіс. Лöсјавтöм кыв – пасьтасис.

135 удж. Сир, ёді, налим, ниа, чими.

Юрсигусь, зі, сиргаг, путник, нидзув.

136 удж. Ёль, яла, йи, юкмös, енэж, йирк, юм.

138 удж. 1) Зэр бöрын жöлöбысь тёпкö войтва.
2) Енэжсянь шонді сјавкйö мелі югöрсö.
3) Ывлаын кыліс гажа серам.

- 142 удж. Нимкодясьö сэтөн
Небыд коръя кыздз.
Мича турун петö,
Вежödöма видз.
- 143 удж. Нидзув, наридз, зöридз; видз.
- 144 удж. Джек, джум, джöм.
- 146 удж. Тшак, тшем, тшук, тшын.
- 157 удж. Ко-дзув-кот-кар, уджач-öсь, кы-дзи,
олан-ин, удж-сö, ви-дзö-ны.
- 159 удж. Педөр уджалö фермаын. Сийö – сиктса
фермер. Фаина лысьтö мös. Сийö йöвсö
кисьтö флягаö.
- 164 удж. Харей, укват, холодильник.
- 165 удж. Поход, колхоз, теплоход, петук, шахта,
сукар, духи, халат, хор, кухня.
- 170 удж. 1) Кринча; 2) паренча; 3) печенча.
- 171 удж. 1) Чарла; 2) чуман; 3) кумач.
- 173 удж. 1) Аньяслөн гажлун кежлö челядь
дасьтисны концерт. 2) Концерт кежлö Цы-
вунина Светалы мамыс вурис ситеч сара-
пан. 3) Света сьылis сцена вылын. 4) Велö-
дысьыс том артистöс шуис молодечөн.
- 177 удж. 1) Щель; 2) ящик; 3) тöщö; 4) плащ.
- 178 удж. Сибдöма щельö, уджалö клещиён, видзö
ящикын, корö прöща, муно щöгöля.
- 183 удж. Войвылö воис гажа тулыс. Ывлаыс югдis.
Лымйыс сьödöдis, ляпкалис. Енэжыс сös-
тöммис. Водз садьмö мелi шондi. Гөгөр
визувтöны варов шоръяс. Сынöдыс ыркыд.
- 186 удж. *Мый?* пельса; *кодi?* кöза; *мый?* лысва.

- 187 удж. *Мый?* анькытш, мырпом, сёркни, капуста, морков.
Коді? жонь, пыста, катша, кӧч, чикыш.
 Лӧсявтӧм кывъяс: визув, пукалӧ, нель.
- 188 удж. Бушков, слӧт, йи.
- 189 удж. 1) Пусьысь; 2) мӧс; 3) ур; 4) ном.
- 190 удж. *Мый?* вой; *мый?* пур; *коді?* ӧш; *мый?* кер; *коді?* мӧс.
- 191 удж. Гӧп – мыльк, вой – лун, збыльтор – небылича, асыв – рыт, выв – ув.
- 193 удж.
 Йӧз: конюк, пастук, кыйсьысь, вӧралысь.
 Пемӧс: сьӧдбӧж, ош, вурдысь, анча.
 Гут-гаг: бобув, чирк, енгаг, мазі.
 Быдмӧг: лежнӧг, берба, пипу, ниа.
 Кельчи кыв эз веськав некутшӧм чукӧрӧ.
- 194 удж. 1. Козъяс. 2. Пызан кокъяс. 3. Чунъяс. 4. Ыжъяс. 5. Порсъяс.
- 196 удж. Бадъяс, войяс, кӧчъяс, кустъяс, лунъяс, пуяс, ягъяс.
- 198 удж. Коръ-яс, ву-джӧръ-яс, лэ-бачъ-яс-лӧн, сизъ-яс, пу-яс, югӧръ-яс, увъ-яс-сӧ, вожъ-яс-сӧ.
- 199 удж. Ягъясын, йывъясыс, сисьяс, пожӧмъяс, туганъяс.
- 222 удж. Каръяс: Инта, Усинск, Микунь. Сиктъяс: Айкатыла, Кӧрткерӧс, Нӧбдін. Лӧсявтӧм кыв – Нӧбъю (юлӧн ним.)
- 225 удж. Эжва ю бокын сулалӧ Визябӧж грезд. Петя да Илля мунісны вотчыны. На бӧрся котӧртис Ваткыль пон.

- 230 удж.** Со и воис тулыс. Төвся узьом бөрын садьмө вөр. Пуяс вылын мыччисисны веж коръяс. Гораа сьылөны лэбачьяс. Эрд вылын кутіс дзоридзавны вижъюр.
- 234 удж.** Тулысын гажөдө, гожөмын ыркөдө, арын вердө, төлын шонтө.
- 237 удж.** 1) Дзольгыны, сельгыны, жургыны, боргыны; 2) мунны, восьлавны, тапиктыны, шалсйыны. Лөсявтөм кыв – корсьны.
- 238 удж.** Сюзь буксө. Катша китшкө. Рака кравзө. Гут дзизгө. Ном тінгө. Чирк чирксө. Утка герчкө.
- 242 удж.** 1) Морков; 2) коз; 3) визяорда; 4) көч.
- 250 удж.** Мелі шонді шонтіс мусө. Гажаа котөртісны гора шоръяс. Мыччисисны сьөд кушинъяс (сылөминъяс). Ябыр сьылө ассьыс тувсовъя сьыланкывсө.
- 253 удж.** Рач-чөв-вын-нэр-рөд-дук-кыз-зор-рос-сер.
- 259 удж.** Локті ёрт дорө, дзебси пу сайө, гижи гожөм йылысь, сулалі кильчө дорын, өшөді гез вылө.
- 260 удж.** Амбар бокө, увъяс вылын, поз дорө, тас вылө, поз пытшкас.
- 264 удж.** Шы, шыалөны; кывзыны, кывзысьяс; рад, радлөны; муса, муслун.

Вежортас гөгөрвоодан кывкуд

Ань – нывбаба

Вөркань – кузь гөна, кузь кокъяса, ичөт юра, пу
вывтi ветлысь ыджыд звер

Вежань – вичкоын кагаос пыртiгөн да ним сетiгөн
отсасьысь ань

Воль – көр либө йөра ку, кодос вольсалöны узы-
ланiнö либө даддьö

Вольöс – скөтлы кок улö вольсалөм турун либө
пу пызь

Гөнбö – еджыд вужъя, морков кодь коръя, кузь
гөна заа быдмөг

Гулю – йөз дорын олысь рудовлөз рөма лэбач,
позсö вөчö керка вевт улö, вичко йывъясö,
сарайясö

Гыр – ид да мукөд сикас тусь поснбөдлан да пызь
вөчан кыз доз

Жонь – гөрд морөса медся ичөт войвыв лэбач

Зарава – тулысын кыддзысь виялан ва; кыз пу ва

Изки – шыдос либө тусь изом вылö изйысь вөчөм
кык круг

Йирк – пөтөлök

Йөгзбö – дзирдалö, югъялö, пөртмасбö

Кальсы – креста ныра, руд мыш выла пыста кодь
визув ичөтик лэбач, уркай

Катшашыдөс – шыдос кодь песни лым

Кельоб – лэбач чукөр

Керас – вөр пөрөдөмин
Колип, колипкай – мичаа сьылысь ичөтик лэбач
Кольта – сывтыр мында вундөм да йиалөм няня
быдмөг (сю, шобді, ид)
Көнтусь – джуджыда быдмысь турун (пыш) кёй-
дыс, сыысь вөчөны вый
Купальнича – посни виж дзоридзьяса турун
Кутш – ыджыд хищной лэбач
Кынь – ручлөн кодь куа звер, ёнджыкасө оло
тундраын
Кыр – вывтасін, джуджыдін; крут чой
Кыркөтш – джуджыд крут берег
Лэбув – сюръяяс вылын вевта восьсаин
Мегыр – гөгрөса кусыньтөм вөв доддялан пу кө-
луй, кодөн пысалөны вожсө сийөс дінас
Мыла – мича, сьөлөмө йиджана
Мышноп – мыш вылын новлөдлан мешök
Наберушка – сямөдысь вөчөм вотчан доз
Неминуча – шог, лектор, виччысьтөмтор
Нур – сёян
Ном – кык бордъя, кузь ныра лэбалысь гут-гаг
Ньöv – вужйысь лыйсян ёсь пома вөсни бедь
Нявда – васөдінын водсөн быдмысь посни еджыд
дзоридзьяса ёг турун
Няньшом – пызбысь көтөм, шоммөдөм гудралөм-
тор
От – мыйлөнкө пасьтаыс
Öжын – паз пискөдан, розь вөчан ёсь йыла көр-
тысь вөчасянтөр
Пинькай – мичаа сьылысь гөрд бока вөрса лэбач

Писти – ваболльён кисьтём вуджан висьёмысь
кучикё кольём туйяс

Понёль – посни лыска пуяс

Прать – өта-мөдыскөд топыда йитчём юрси чукөр

Пур – ваөд кылөдөм вылө отлаөдөм, йитөм уна кер

Пучер – пулөн кокыс, кысянь быдмёны увъяс

Пыллыны – чирйыны, кышйыны, весавны

Сан – сьөдовруд гёна, кызкодь дженъыдик кока,
дона куа вёрса пемös

Слөт – лым сора зэр

Сёрд – васөд увтасінын лыска вөр

Сёркни – виж рёма, гөгрös град выв пуктас

Сён – вöрын, видз вылын васөд увтас места

Сиргаг – кузь усъяса лы кодь чорыд кышöда
ыджыд сьөд гаг

Тшем – сук, тшöкыд

ТЬös – керйысь пилитөм вöсни кузь пöv

Чибльöг – сямöдысь гартыштөм, беддьö пысалөм
ва юан доз

Чими – сёмга

Чуж – пöжөм, юммөдөм нянь кöйдыс, сыысь вö-
чöны чужва

Чуман – вотös да тшак вотөм вылө сямöдысь
вöчөм көрöб кодь доз

Шер – йиа зэр

Шляка – ва лым

Юсь – шоныдінын төвйысь кузь вöсни голяа,
еджыд либö сьөд гёна вавывса ыджыд лэбач

Паныд вежӧртаса кывъяс

асыв	—	рыт
вӧсни	—	кыз
вой	—	лун
восьтыны	—	пӧдлавны
выв	—	ув
выль	—	важ
гӧп	—	мыльк
гулыд	—	тшем
дженъид	—	кузь
джуджыд	—	ляпкыд
еджыд	—	сьӧд
збой	—	полысь
збыльтор	—	небылича
кӧдзыд	—	шоньд
кизьӧр	—	сук
лун	—	вой
лунвыв	—	войвыв
мунны	—	локны
нэр	—	ён
озыр	—	гӧль
ӧзтыны	—	кусӧдны
паськыд	—	векни
петны	—	пырны
сӧдз	—	гудыр
сьӧкыд	—	кокни
том	—	пӧрысь
чорыд	—	небыд
ыджыд	—	ичӧт
югыд	—	пемыд
юмов	—	курыд

Матын вежӱртаса кывъяс

авъя, шань, вежӱра
апавны, лолавны
бедь, палич
биавиж, вижовруд, вижовгӱрд
блед, быгыд, кельыд
брӱд, люстик, сулик
бужӱд, кыр, кырӱм
букыд, букыш
бурӱдны, такӱдны, лӱньӱдны, ӱвсьӱдны
бур сьӱлӱма, уважлив
варов, сӱрниа, кыв-вора
вежӱртны, гӱгӱрвоны
вежӱра, тӱлка
вежавидзана, пыдди пуктана
видзаасьны, чолӱмасьны, здоровайтчыны, киасьны
видзӱны, дӱзьӱритӱны
вильыш, ышмысь
вильшасьны, ышмыны, дурны
вильыд, вольк
вичмыны, сюрны, шедны
войтавны, виявны, тӱпкыны
воль, кӱр ку
вольӱс, джодждӱра
восьсаин, эрд
восьлавны, мунны
вотны, ӱктыны
воча, паныд
вӱвлытӱмтор, лӱсявтӱмтор, небылича

вөй, кид, полысь
вундыны, чилснитны
вылө пуксьысь, тшап
вын, эбөс, ёнлун, этш
вына, эбөса, вынйөра, ён, ойөса
вынсявны, ёнмыны, сөвмыны, эбөссявны
гажаа, кыпыда
гаровтчис, гартовтчис
гоннявны, чатрасьны
гора, лэчыд
гырысь, ыджыд
дед, пөль, ыджыд бать
детинка, зонка
джум, йир
дзибрөс, лайкыд, лайкъялысь, катласян
дзоля, ичөт, дзоляник
дзор, еджыд
дзугыль, шог
друг, нем виччысьтөг
дук, көр, ис
дум, мөвп
думайтны, мөвпавны
дэбыд, шоныд
енбиа, таланта
ёг, лөп
ёртасьны, дружитны, лөсъявны, ладмыны
ёсь, лэчыд
жугыль, шог
жыр, вежөс, комната
зіль, уджачлив, уджач

идөра, пельк, сөстөм
идравны, пелькөдны
ичот, дзоля, ичотик, нейджыд, посни, посныдик
йиа шер, катшашыдос
йирк, пөтөлөк
йирсянін, луд
йөгзыны, дзирдавы
кад, пөра
кельоб, чукөр
керос, мыльк, нөрыс, рөч, чой
киподтуя, кужысь, мастер, сяма
клёнөдчө, тотшкөдчө
козин, гөснеч, пөдарки
козьнавы, пөдаритны
крепыд, зумыд
кыпыд, гажа
кыпөдны, лэптыны, лыбөдны
кыскыны, нуны
кычан, кычипи, понпи
кышөд, эжөд
кышакывны, шаркакывны, шуракывны
лад, арт, пөрадок
лөк, омөль
лөктор, рөк, неминуча
лөньны, ланьтны
лөня, чөла
лөп, ёг
лышкыд, личыд, прөст
лэбув, кобув, сайник
лэчыд, ёсь, гора, пель чунөдан

ляб, жеб
мольыд, шыльыд
му, ыб
мудер, наян
надзён, ньөжйө
наберушка, чуман
налык, чөс
небөг, книга
нимкодясьны, радлыны
нор, шог
нур, сёян-юан, сёян
нуръясьны, сёйны
нэр, жеб
нюдз, лайкыд, нюклясян, куснясян
нюмсер, нюм
няр, бөрдысь
омөльтны, кулитны, лёкөдны, увтыртны
от, пасьта
ота, паськыд
оттөм, векни
ошкыны, сьөлөм сетны
ошйысьны, ышнясьны
өбед, пажын
өбича, ру, сям, этш
өлөдны, дугөдны, ланьтөдны
палич, бедь
пальөдны, садьмөдны
панясьны, сёйны
пельса, шомөс
пемдыны, рөмдыны
повтөм, збой

полысь, вöй
порсь, польö
пöль, дед
пöра, кад
пöрнöй, верстьö
пöрысь, олöма
пöч, баб, ыджыд мам
пöчөн шуысь, внук, внучка
прöсека, визир
саймовтны, дзебны
сер, узор
серавны, ваксьыны, гигзьыны, кильскыны, китш-
кыны
сён, лог, нюкös, нюкыс
сiсь, ропмунöм
сiсьмыны, ропмунны
скөр, лёк, лөг
скуп, зэлыд, топыд
смел, збой
сöдз, пырыс тыдалан, югыд
сук, тшем, тшöкыд
сутш, здук
сэзьдыны, мичаммыны
сюсь, вежöра
сям, вежөр, морттуй
сяма, вежöра
такöдны, бурöдны
теш, шмонь
тешкодь, серам петкöдлан
тöд вылö уськöдны, казьтыштны
тöщö, горсья

тшап, ышнясьысь, ыкша, вылө пуксьысь, тшөгөль
тшөг, кыз, госа
тшук, стөч
тэрыб, визув, чож, пельк, писькөс
тэрыба, өдйө, өдөба, чожа
улөс, джек
чань, чибө
чача, ворсантор
чепня, черпушка, чепник
чизыр, ёсь, лэчyd (төв)
чолөм, видза, копыр, поклон
чөв, лөнь, шы ни төв
чөла, лөня
чужанін, айму, асму, чужан му
чуткыны, сутшкыны
шаг, воськов
шать, шатин
шемөс, шензьөм
шмонитны, серавны, шутитны
шог, гажтөм, жугыль, нор
шоч, гежд, кизьөр
шусьөг, пөслөвича
шы, гор
шыльөдны, сынавны, мольөдны
ыркыд, сайкыд
эшкын, шебрас, шебрөд
этш, обича
юөртны, висьтавны, төдмөдны
юрвеж, память
юрсикт, райцентр

Комиа-роча кывчукӧр

Лэбач нимъяс – Названия птиц

байдӧг – куропатка
дзодзӧг – гусь
джыдж – береговая ласточка, стриж
гулю – голубь
дозмӧр – глухарь
жонь – снегирь
каля – чайка
кутш – орёл
ӧмидзкай – малиновка
пелыськай – дрозд-рябинник
пинькай – зяблик
пыста – синица
пышкай – воробей
сизь – дятел
сьӧла – рябчик
сюзь – сова
сырчик – трясогузка
тар – тетерев
уркай – клёст
юсь – лебедь
ябыр – скворец

Вөрса пемӧс нимъяс – Названия диких животных

анча – норка
визяорда – бурундук
вӧрканы – рысь
вурд – выдра
вурдысь – крот
йӧра – лось
кӧр – олень
кынь – песец
мой – бобр
низь – соболь
ош – медведь
сан – росомаха
сьӧдбӧж – горноста́й
тулан – куница

Чери нимъяс – Названия рыб

гыч – карась
ёді – лещ
ёкыш – окунь
кельчи – плотва
мык – елец
сын – язь
сир – щука
чими – сёмга

Юриндалысь

СЁРНИ. ТЕКСТ

Сёрни	4
Кыв. Сёрникузя да сёрни	6
Текстлөн тема да шөр мөвп. Юрним	9

КЫВТЭЧАС ДА СЁРНИКУЗЯ

Юөртана, юалана да чуксалана сёрникузяяс.	
Горөдана да абу горөдана сёрникузяяс	12
Подувпас.....	18
Юөрпас.....	20

ШЫ ДА ШЫПАС

Анбур.....	23
Гласнөй шыяс да шыпасъяс.....	27
Согласнөй шыяс да шыпасъяс.	
Гора да гортөм согласнөй шыяс.....	29
Опорнөй кывъяс. План	34
Слог. Кывъяс визьысь визьö вуджөдөм	37
Текстлөн сикасъяс.....	40
Текст-юөртөм	44
Небыд пас (ь) кыв помын да кыв шөрын	49
Небыд паса кывъяс визьысь визьö вуджөдөм ..	52
Е, Ё, Ю, Я – йота гласнөйяс	54
Согласнөйяс бөрын А да Я шыпасъяс гижөм ...	55
Согласнөйяс бөрын У да Ю шыпасъяс гижөм ..	57
Согласнөйяс бөрын О да Ё шыпасъяс гижөм ...	60
Согласнөйяс бөрын Э да Е шыпасъяс гижөм	63
Согласнөйяс бөрын И да І шыпасъяс гижөм	66
А-Я, У-Ю, Э-Е, О-Ё, И-Й шыпасъяс.....	67

Дз [z'] шыа кывъяс.....	69
Дж [z] шыа кывъяс.....	70
Тш [ч] шыа кывъяс.....	71
Дз, Дж, Тш шыпаса кывъяс визъысь визьö	
вуджöдöм	75
П да Ф шыпаса кывъяс	78
К да Х шыпаса кывъяс	81
Ч да Ц шыпаса кывъяс	84
Щ шыпаса кывъяс	87

КЫВСИҚАСЪЯС

Предмет, действие да признак нимъяс.....	89
Эмакыв.....	91
Эмакывлөн лыд. Ъ да Ъ – торйöдан пасъяс.....	94
Морт нимъясын, овъясын да вичъясын	
ыджыд шыпас.....	98
Йöзкостса ним-вичъяс	101
Пемöс нимъясын ыджыд шыпас	103
Кар, сикт, грезд, ю нимъясын ыджыд шыпас	107
Кадакыв	111
Кывберд	115
Кывбөр	120
Öтвужъя кывъяс.....	122

Прöверит асьтö.....	125
Вежöртас гөгөрвоöдан кывкуд	130
Паныд вежöртаса кывъяс	133
Матын вежöртаса кывъяс	134
Комиа-роча кывчукөр	140

Допущено Министерством образования Республики Коми

Учебное издание

Полякова Эльвира Ивановна

КОМИ РЕЧЬ

Упражнения по коми языку
для 2 класса

На коми языке

Художник **И. А. Авилова**

В оформлении издания использованы фото В. В. Прокушева

Редактор В. И. Трошева
Художественный редактор И. А. Авилова
Технический редактор, компьютерная вёрстка – С. И. Оверин
Корректор Ю. В. Харкун

Подписано к печати 18.11.13. Формат 70x100¹/₁₆
Бумага офсетная. Печать офсетная
Усл. печ. л. 11,61. Уч.-изд.л. 6,84
Тираж 640 экз. Заказ № 6850

ООО «Анбур». 167982, г. Сыктывкар, ул. К.Маркса, 229

Отпечатано с готового оригинал-макета в полном соответствии
с качеством предоставленных материалов
в ООО «Коми республиканская типография»
167982, г. Сыктывкар, ул. В.Савина, 81. Тел. (8212) 28-46-71, 28-46-61

ISBN 978-5-91669-114-6



9 785916 691146

АНБУ
Сыктывкар
2013

